

古今文綜

野居書肆



古今文綜 第二部 書牘贈序之屬

第十册

目錄

第一編 書牘類

第三章 敘事之書下

(己) 諷勸

漢王生遺蓋寬饒書

漢朱浮與彭寵書

漢王粲爲劉荊州與袁尙書

漢王粲爲劉荊州與袁譚書

漢阮瑀爲曹公作書與孫權

梁邱遲與陳伯之書

陳徐陵爲貞陽侯重與王太尉書

宋歐陽修與高司諫書

宋王安石上田正言第一書

清多爾袞與明史可法書

清侯方域癸未去金陵日與阮光祿書

清劉嗣綰貽友人書

清黃安濤覆友人商游幕書

清王誥壽與友人書

清趙銘上薛慰農夫子書

(庚)慰藉

晉陸雲答車茂安書

唐韓愈與崔羣書

唐柳宗元賀進士王參元失火書

清袁枚慰蔣用菴侍御失火書

清張裕釗與張煦堂大令書

清張裕釗答李佛笙太守書

(辛)干謁

齊邱巨源與尙書令袁粲書

梁江淹詣建平王上書

陳徐陵與王僧辯書

唐李白與韓荊州朝宗書

唐李白上安州裴長史書

唐郭仲翔與吳保安書

宋蘇轍上樞密韓太尉書

宋王安石上相府書

清陳維崧上芝麓先生書

清李慈銘與王少鶴通政書

(壬) 況狀

宋鮑照登大雷岸與妹書

梁簡文帝與劉孝綽書

梁簡文帝答張纘謝示集書

梁蕭統答湘東王求文集及詩苑英華書

梁陶弘景答謝中書書

梁吳均與宋元思書

梁劉潛北使還與永豐侯書

唐王維山中與裴迪秀才書

宋張詠答王觀察書

清毛奇齡與秦留仙翰林書

清陳維崧與陳際叔書

清洪亮吉與崔瘦生書

清胡天游貽友人書

清劉嗣綰山中與鮑茗洲書


清吳慈鶴與彭甘亭書

清董基誠至青浦縣與弟方立書

清董祐誠與方彥聞書

清李慈銘復張香濤編修書

清李慈銘三復趙桐孫書



古今文綜

第一部 書牘贈序之屬

第十册

杭縣張 相讓錄

杭縣姚漢章閱訂

第一編 書牘類

第三章 敘事之書下

(己) 諷勸 此之爲體或婉或直然其蹊徑可約爲三敵國兵交使在其間搏
闔從衡馮乎簡牘要在開形勢指利害一紙之書賢於十萬之兵如朱叔元王仲
宣阮元瑜邱希範徐孝穆多爾袞諸書是也策名委贄重其官守亢進可危瘵職
可戒至若天下之崑一時之瑣聲罪致討足以褫魄然辭亦少激焉如王生永叔
介甫朝宗諸書是也軫念身世商略出處闡風縹馬之思空谷維駒之詠語長心
重惻乎動人如劉醇甫黃霽青王眉叔趙桐孫諸書是也共錄十五首

漢王生遺蓋寬饒書

明主知君潔白公正。不畏疆禦。故命君以司察之位。擅君以奉使之權。尊官厚祿。已施於君矣。君宜夙夜惟思。當世之務。奉法宣化。憂勞天下。雖日有益。月有功。猶未足以稱職而報恩也。自古之治。三王之術。各有制度。今君不務循職而已。迺欲以太古久遠之事。匡拂天子。數進不用。難聽之語。以摩切左右。非所以揚令名。全壽命者也。方今用事之人。皆明習法令。言足以飾君之辭。文足以成君之過。君不惟蘧氏之高蹤。而慕子胥之末行。用不訾之軀。臨不測之險。竊爲君痛之。夫君子直而不挺。曲而不詘。大雅云。旣明且哲。以保其身。狂夫之言。聖人擇焉。惟裁省覽。

漢朱浮與彭寵書

蓋聞智者順時而謀。愚者逆理而動。常竊悲京城太叔。以不知足而無賢輔。卒自棄於鄭也。伯通以名字典郡。有佐命之功。臨民親職。愛惜倉庫。而浮秉征伐之任。欲權時救急。二者皆爲國耳。卽疑浮相譖。何不詣闕自陳。而爲滅族之計乎。朝廷

之於伯通恩亦厚矣。委以大郡。任以威武。事有柱石之寄。情同子孫之親。匹夫媵母。尙能致命一殮。豈有身帶三綬。職典大邦。而不顧恩義。生心外叛者乎。伯通與吏民語。何以爲顏。行步拜起。何以爲容。坐臥念之。何以爲心。引鏡窺景。何以施眉目。舉厝建功。何以爲人。惜乎。棄休令之嘉名。造梟鴟之逆謀。捐傳葉之慶祚。招破敗之重災。高論堯舜之道。不忍桀紂之性。生爲世笑。死爲愚鬼。不亦哀乎。伯通與耿俠遊。俱起佐命。同被國恩。俠遊謙讓。屢有降挹之言。而伯通自伐。以爲功高。天下往時。遼東有豕生子。白頭異而獻之。行至河東。見羣豕皆白。懷慙而還。若以子之功。論於朝廷。則爲遼東豕也。今乃愚妄自比六國。六國之時。其勢各盛。廓土數千里。勝兵將百萬。故能據國相持。多歷年所。今天下幾里。列郡幾城。奈何以區區漁陽而結怨。天子此猶河濱之人。捧土以塞孟津。多見其不知量也。方今天下適定。海內願安。士無賢不肖。皆樂立名於世。而伯通獨中風狂走。自捐盛時。內聽嬌婦之失計。外信讒邪之諛言。長爲羣后惡法。永爲功臣鑒戒。豈不誤哉。定海內者。

無私讐。勿以前事自疑。願留意顧老母少弟。凡舉事無爲親厚者所痛。而爲見讐者所快。

漢王粲爲劉荊州與袁尙書

表頓首頓首將軍麾下。勤整六師。芟討暴虐。戎馬廝養。罄無不宜。甚善甚善。河山阻限。狼虎當路。雖遣驛使。或至或否。□使引領告而莫達。初聞郭公則辛仲治通內外之言。造交構之隙。使士民不協。姦孽並作。聞之諤然。爲增忿怒。校尉劉堅。皇河田買等。前後到荊。得二月六日所起書。又得賢兄貴弟顯雍及審別駕書。陳敘事變本末之理。知變起辛郭禍結同生。追闕伯實沈之蹤。忘棠棣死喪之義。親尋干戈。僵死流血。聞之哽咽。若存若亡。乃追案書傳。思與古比。昔軒轅有涿鹿之戰。周公有商奄之軍。皆所以剪除災害而定王業者也。非強弱之爭。喜怒之忿也。是故滅親不爲尤。誅兄不傷義也。今二君初承洪業。纂繼前軌。進有國家傾危之慮。退有先公遺恨之責。當惟曹氏是務。不爭雄雌之勢。惟國是康。不計曲直之利。雖

蒙塵垢罪下爲隸圉析入汙泥猶當降志辱身方以定事爲計何者夫金木水火以剛柔相濟然後克得其和能爲民用若使金與金相連火與火相爛則燠然摧折俱不得其所也今青州天性峭急迷於目前曲直是非昭然可見仁君智數弘大綽有餘裕當以大包小以優容劣歸是於此乃道教之和義士之行也縱不能爾有難忍之忿且當先除曹操以卒先公之恨事定之後乃議兄弟之怨使記注之士定曲直之評不亦上策耶且初天下起兵以尊門爲主是以衆寡喁喁莫不樂袁氏之大也今雖分裂有存有亡嚮然景附未有革心若仁君兄弟能悔前之謬克己復禮以從所驩則弱者自以爲強危者自以爲寧誠欲戮力長驅共獎王室雖亡之日猶存之願則伊周不足參五伯不足六也若使迷而不返遂而不改則戎狄蠻夷將有誚讓之言況我同盟復能戮力爲君之役哉則是太公墳壠將有汙池之禍夫人弱小將有滅族之變彼之與此豈可同日而論之哉且行違道以自存猶尙不可況失義以自亡而遺敵之禽哉此韓盧東郭自困於前而遺田

父之獲也。昔齊公孫竈卒。晏子知子期之不免也。故曰二惠競爽猶可。又弱一箇姜氏危哉。表與劉左將軍及北海孫公佑共說此事。未嘗不痛心入骨。相爲悲傷也。今整勒士馬。憤踊鶴立。冀聞和同之聲。約一舉之期。故復遣信。并與青州書。若其泰也。則袁族其與漢升降乎。若其否也。則同盟永無望矣。臨書愴恨。不知所言。劉表頓首。

漢王粲爲劉荊州與袁譚書

天降災害。禍難殷流。初交殊族。卒成同盟。使王室震蕩。彝倫攸斁。是以智達之士。莫不痛心入骨。傷時人不能相忍也。然孤與太公志同願等。雖楚魏絕邈。山河迴遠。戮力乃心。共獎王室。使非族不干吾盟。異類不絕吾好。此孤與太公無貳之所致也。功績未卒。太公殂隕。賢胤承統。以繼洪業。宣奕世之德。履丕顯之祚。摧嚴敵於鄴都。揚休烈於朔土。顧定疆宇。虎視河外。凡我同盟。莫不景附。青蠅飛於竿旌。無忌游於二壘。使股肱分成。二體胸膺。絕爲異身。初聞此問。尙謂不然。定聞

信來乃知闕伯實沈之忿已成棄親卽讎之計已決旃旃交於中原暴尸累於城下聞之哽咽若存若亡昔三王五伯下及戰國君臣相弑父子相殺兄弟相殘親戚相滅蓋時有之然或欲以成王業或欲以定霸功皆所謂逆取順守而徼富強於一世也未有棄親卽異兀其根本而能全軀長世者也昔齊襄公報九世之讐士句卒荀偃之事是故春秋美其義君子稱其信夫伯游之恨於齊未若太公之忿於曹也宣子人臣承業未若仁君之繼統也且君子違難不適讐國交絕不出惡聲況忘先人之讐棄親戚之好而爲萬世之戒遺同盟之恥哉蠻夷戎狄將有誚讓之言況我族類而不痛心邪夫欲立竹帛於當時全宗祀於一世豈宜同生分謗爭校得失乎若冀州有不弟之傲無慙順之節仁君當降志辱身以濟事爲務事定之後使天下平其曲直不亦爲高義邪今仁君見憎於夫人未若鄭莊之於姜氏昆弟之嫌未若重華之於象敖然莊公卒從大隧之樂象敖終受有鼻之封願捐棄百痾追攝舊義復爲母子昆弟如初今整勒士馬瞻望鵠立

漢阮瑀爲曹公作書與孫權

離絕以來。於今三年。無一日而忘前好。亦猶姻媾之義。恩情已深。違異之恨。中間尙淺也。孤懷此心。君豈同哉。每覽古今。所由改趣。因緣侵辱。或起瑕釁。心忿意危。用成大變。若韓信傷心於失楚。彭寵積望於無異。盧綰嫌畏於已隙。英布憂迫於情漏。此事之緣也。孤與將軍。恩如骨肉。割授江南。不屬本州。豈若淮陰捐舊之恨。抑遏劉馥。相厚益隆。寧放朱浮顯露之奏。無匿張勝貸故之變。非有陰構賁赫之告。固非燕王淮南之釁也。而忍絕王命。明棄碩交。實爲佞人所構。會也。夫似是之言。莫不動聽。因形設象。易爲變觀。示之以禍。難激之以恥。辱大丈夫雄心。能無憤發。昔蘇秦說韓。羞以牛後。韓王按劍作色。而怒。雖兵折地割。猶不爲悔人之情也。仁君年壯。氣盛。緒信所嬖。既懼。患至兼懷。忿恨不能復遠。孤心近慮。事勢遂齋。見薄之決計。秉翻然之成議。加劉備相扇揚。事結釁連。推而行之。想暢本心。不願於此也。孤之薄德。位高任重。幸蒙國朝將泰之運。蕩平天下。懷集異類。喜得全功。

長享其福而姻親坐離。厚援生隙。常恐海內多以相責。以爲老夫苞藏禍心。陰有鄭武取胡之詐。乃使仁君翻然自絕。以是忿忿懷慙。反側常思除棄小事。更申前好。二族俱榮。流祚後嗣。以明雅素中誠之效。抱懷數年。未得散意。昔赤壁之役。遭離疫氣。燒船自還。以避惡地。非周瑜水軍所能抑挫也。江陵之守。物盡穀殫。無所復據。徙民還師。又非瑜之所能敗也。荆土本非己分。我盡與君。冀取其餘。非相侵肌膚有所割損也。思計此變。無傷於孤。何必自遂於此。不復還之高帝。設爵以延田橫。光武指河而誓朱鮪。君之負累。豈如二子。是以至情。願聞德音。往年在譙。新造舟船。取足自載。以至九江。貴欲觀湖濶之形。定江濱之民耳。非有深入攻戰之計。將恐議者大爲己榮。自謂策得。長無西患。重以此故。未肯迴情。然智者之慮。慮於未形。達者所規。規於未兆。是故子胥知姑蘇之有麋鹿。輔果識智伯之爲趙禽。穆生謝病。以免楚難。鄒陽北遊。不同吳禍。此四士者。豈聖人哉。徒通變思深。以微知著耳。以君之明。觀孤術數量。君所據相計土地。豈勢少力乏。不能遠舉。割江之

表○宴○安○而○已○哉○甚○未○然○也○若○恃○水○戰○臨○江○塞○要○欲○令○王○師○終○不○得○渡○亦○未○必○也○夫
水○戰○千○里○情○巧○萬○端○越○爲○三○軍○吳○曾○不○禦○漢○潛○夏○陽○魏○豹○不○意○江○河○雖○廣○其○長○難
衛○也○凡○事○有○宜○不○得○盡○言○將○修○舊○好○而○張○形○勢○更○無○以○威○脅○重○敵○人○然○有○所○恐○恐
書○無○益○何○則○往○者○軍○逼○而○自○引○還○今○日○在○遠○而○興○慰○納○辭○遜○意○狹○謂○其○力○盡○適○以
增○驕○不○足○相○動○但○明○效○古○當○自○圖○之○耳○昔○淮○南○信○左○吳○之○策○隗○囂○納○王○元○之○言○彭
寵○受○親○吏○之○計○三○夫○不○寤○終○爲○世○笑○梁○王○不○受○詭○勝○竇○融○斥○逐○張○玄○二○賢○既○覺○福
亦○隨○之○願○仁○君○少○留○意○焉○若○能○內○取○子○布○外○擊○劉○備○以○效○赤○心○用○復○前○好○則○江○表
之○任○長○以○相○付○高○位○重○爵○坦○然○可○觀○上○令○聖○朝○無○東○顧○之○勞○下○令○百○姓○保○安○全○之
福○君○享○其○榮○孤○受○其○利○豈○不○快○哉○若○忽○至○誠○以○處○僥○倖○婉○彼○二○人○不○忍○加○罪○所○謂
小○人○之○仁○大○人○之○賊○大○雅○之○人○不○肯○爲○此○也○若○憐○子○布○願○言○俱○存○亦○能○傾○心○去○恨
順○君○之○情○更○與○從○事○取○其○後○善○但○禽○劉○備○亦○足○爲○效○開○設○二○者○審○處○一○焉○聞○荆○揚
諸○將○並○得○降○者○皆○言○交○州○爲○君○所○執○豫○章○距○命○不○承○執○事○疫○旱○並○行○人○兵○減○損○各

求進軍。其言云。孤聞此言。未以爲悅。然道路既遠。降者難信。幸人之災。君子不爲。且又百姓國家之有。加懷區區。樂欲崇和。庶幾明德來見。昭嗣不勞而定。於孤益貴。是故按兵守次。遣書致意。古者兵交。使在其中。願仁君及孤。虛心回意。以應詩人補袞之歎。而慎周易牽復之義。濯鱗清流。飛翼天衢。良時在茲。曷之而已。

梁邱遲與陳伯之書

遲頓首。陳將軍足下。無恙。幸甚。幸甚。將軍勇冠三軍。才爲世出。棄燕雀之小志。慕鴻鵠以高翔。昔因機變化。遭遇明主。立功立事。開國稱孤。朱輪華轂。擁旄萬里。何其壯也。如何。一旦爲奔亡之虜。聞鳴鏑而股戰。對穹廬以屈膝。又何劣邪。尋君去就之際。非有他故。直以不能內審諸己。外受流言。沈迷猖獗。以至於此。聖朝赦罪。責功棄瑕。錄用。推赤心於天下。安反側於萬物。此將軍之所知。不假僕一二談也。朱鮪涉血於友于。張繡剗刃於愛子。漢主不以爲疑。魏君待之若舊。況將軍無昔人之罪。而勳重於當世。夫迷塗知反。往哲是與。不遠而復。先典攸高。主上屈法申

恩吞舟是漏。將軍松柏不翦。親戚安居。高臺未傾。愛妾尙在。悠悠爾心。亦何可言。今功臣名將。雁行有序。佩紫懷黃。讚帷幄之謀。乘軺建節。奉疆場之任。並刑馬作誓。傳之子孫。將軍獨覲顏。借命驅馳。氈裘之長。寧不哀哉。夫以慕容超之強。身送東市。姚泓之盛。面縛西都。故知霜露所均。不育異類。姬漢舊邦。無取雜種。北虜僭盜中原。多歷年所。惡積禍盈。理至焦爛。況僞嬖昏狡。自相夷戮。部落攜離。酋豪猜貳。方當繫頸蠻邸。懸首藁街。而將軍魚游於沸鼎之中。燕巢於飛幕之上。不亦惑乎。暮春三月。江南草長。雜花生樹。羣鶯亂飛。見故國之旗鼓。感生平於疇昔。撫絃登陣。豈不愴恨。所以廉公之思趙將。吳子之泣西河。人之情也。將軍獨無情哉。想早勳良規。自求多福。當今皇帝盛明。天下安樂。白環西獻。楛矢東來。夜郎滇池。解辮請職。朝鮮昌海。蹶角受化。惟北狄野心。偏強沙塞之間。欲延歲月之命耳。中軍臨川殿下。明德茂親。總茲戎重。弔民洛汭。伐罪秦中。若遂不改。方思僕言。聊布往懷。君其詳之。邱遲頓首。

陳徐陵爲貞陽侯重與王太尉書

淵明頓首頓首。席威卿等還。枉此月十四日告。披覽未周。良深慨息。昔長平建策。猶聞蝕鼻之徵。疎勒效忠。時致飛泉之感。豈在余涼。德書不盡。言遂使吾賢猶迷。所執斯故。銜哀掩淚。仍復披陳者也。孤以庸薄。寧有霸圖。侯服于周。常懼盈滿。豈望身居黃屋。手御青綸。揖讓而對三靈。端委而朝百辟。詢諸園牧。莫不皆知。援誓神明。固自無爽。但大齊仁信之道。關于至誠。睦隣之懷。由于孝德。遂蒙殊獎。歸嗣本朝。拜首陳辭。敦誘彌廣。旣而仇讎未殄。方憑大國之威。宗祏隲危。尤仰親仁之德。僮俛恩寄。號覲惟深。而勅諭分明。信誓殊重。乃云邦家有乂。社稷無虞。凡廣陵歷陽。皆許見還。白水黃河。屢奉然諾。至于夏藩衝要。控遏上流。且命彊兵。爲我臨據。若其自有精甲。能捍醜徒。並用還梁。皆如前旨。以孤頻經。忝竊屢守。淮肥門生。故吏。遍于江右。凡諸部曲。並使招攜。投赴戎行。前後雲集。霜戈雪戟。無非武庫之兵。龍甲犀渠。皆是雲臺之仗。文物以紀之。聲名以發之。斯實不世之隆恩。寧曰循

常之恆禮。明公固天所授。宏濟本朝。曲阜同功。營邱等烈。若夫伊尹庖廚賤宰。霍光階闈小臣。諸葛亮無應變之才。管夷吾非王者之佐。論其世業。較彼勤勞。書契以來。罕有明德。且程嬰之義。自古爲難。苟息之忠。良以喜慰。但先朝秉玉鏡之符。御金輪之寶。菩薩之化。行于十方。仁壽之功。沾于萬國。兇人侯景。遂殄邦家。何況于今。亦有吳會。江東如掌。差非虛言。淮陽在面。方此非局。不稼不穡。多歷歲時。大東小東。全無機杼。關中醜虜。寧非冒頓之鋒。齊國強兵。便是軒轅之陣。西南當扼喉之勢。東北承撫背之機。首尾交侵。華夷俱騁。而冲人數歲。復子方賒。德未感于黎蒸。威不加于將帥。斯等怏怏。非少主臣。安有碌碌。因人成事。公之才具。雖復明允。勢何如於天監。時何若于大同。棄與國之隆恩。當滔天之猛寇。匡救之德。翻未有從忠許之謀。誰其相曉。臥薪待火。方此弗危。繫草從風。儔之非切。若能思其上策。審此英圖。見引軫獵之車。還向長安之邸。一則二則。惟在大賢。外相內相。終當相屈。正當攜諸舊隸。率我賓游。朝服簪纓。直拜園寢。梁人望國。俱登赤馬之舟。齊

帥臨江。仍轉蒼鷹之旆。分袂南浦。揚鞭北風。民不疲勞。軍無怨讟。如其執事。尙秉
前言。將恐戎麾。便濟江表。何則。西浮夏首。已據咽喉。東進彭波。次指心腹。廣陵京
口。烽煙相望。魯柝聞邾。方之尙遠。胡桑對薊。匹此爲遙。水陸爭前。龍虎交至。則揚
都蕩定。功自齊師。江左臣民。無關梁國。豈不遺慙。後主崇寄之恩。還負齊朝。親隣
之意。東門黃犬。固以長悲。南陽白衣。何可復得。立茲幼弱。非曰大勳。滅我宗祏。何
所逃。豐今復遣前吉州刺史馬嵩仁至彼。更具往懷想不遠而復無貽。祇悔也。英
謨有在。方興祀夏之功。明監如違。便等過殷之歎。存亡社稷。一在于公。臨紙崩號。
不復多及。蕭淵明頓首頓首。

宋歐陽修與高司諫書

修頓首再拜白。司諫足下。某年十七時。家隨州。見天聖二年進士及第榜。始識足
下姓名。是時予年少。未與人接。又居遠方。但聞今宋舍人兄弟。與葉道卿鄭天休
數人者。以文學大有名。號稱得人。而足下。廁其閒。獨無卓卓。可道說者。予固疑足

下不知何如人也。其後更十一年。予再至京師。足下已爲御史裏行。然猶未暇一識足下之面。但時時於予友尹師魯問足下之賢否。而師魯說足下正直有學問。君子人也。予猶疑之。夫正直者不可屈曲。有學問者必能辨是非。以不可屈之節。有能辨是非之明。又爲言事之官。而俯仰默默無異衆人。是果賢者耶。此不得使予之不疑也。自足下爲諫官來。始得相識。侃然正色論前世事。歷歷可聽。褻貶是非無一謬說。噫。持此辯以示人。孰不愛之。雖予亦疑足下真君子也。是予自聞足下之名。及相識。凡十有四年。而三疑之。今者推其實迹而較之。然後決知足下非君子也。前日范希文貶官後。與足下相見於安道家。足下詆誚希文爲人。予始聞之。疑是戲言。及見師魯亦說足下深非希文所爲。然後其疑遂決。希文平生剛正。好學通古。今其立朝有本末。天下所共知。今又以言事觸宰相得罪。足下既不能爲辨其非辜。又畏有識者之責己。遂隨而詆之。以爲當黜。是可怪也。夫人之性。剛果懦。輒稟之於天。不可勉強。雖聖人亦不以不能責人之必能。今足下家有老母。

身惜官位懼飢寒而顧利祿不敢一忤宰相以近刑禍此庸人之常情不過作一不才諫官爾雖朝廷君子亦將閔足下之不能而不責以必能也今乃不然反昂然自得無愧畏便毀其賢以爲當黜庶乎飾己不言之過夫力所不敢爲乃愚者之不逮以智文其過此君子之賊也且希文果不賢耶自三四年來從大理寺丞至前行員外郎作待制日日備顧問今班行中無與比者是天子驟用不賢之人夫使天子待不賢以爲賢是聰明有所未盡足下身爲司諫乃耳目之官當其驟用時何不一爲天子辨其不賢反默默無一語待其自敗然後隨而非之若果賢耶則今日天子與宰相以忤意逐賢人足下不得不言是則足下以希文爲賢亦不免責以爲不賢亦不免責大抵罪在默默爾昔漢殺蕭望之與王章計其當時之議必不肯明言殺賢者也必以石顯王鳳爲忠臣望之與章爲不賢而被罪也今足下視石顯王鳳果忠邪望之與章果不賢邪當時亦有諫臣必不肯自言畏禍而不諫亦必曰當誅而不足諫也今足下視之果當誅邪是直可欺當時之

人而不可欺。後世也。今足下又欲欺人而不懼後世之不可欺。邪。況今之人未可欺也。伏以今皇帝卽位以來。進用諫臣。容納言論。如曹修古。劉越。雖歿猶被褒稱。今希文與孔道輔。皆自諫諍擢用。足下幸生此時。遇納諫之聖主如此。猶不敢一言何也。前日又聞御史臺榜朝堂。戒百官不得越職言事。是可言者。惟諫臣爾。若足下又遂不言。是天下無得言者也。足下在其位而不言。便當去之。無妨他人之堪其任者也。昨日安道貶官。師魯待罪。足下猶能以面目見士大夫。出入朝中。稱諫官。是足下不復知人間有羞恥事爾。所可惜者。聖朝有事。諫官不言。而使他人言之。書在史冊。他日爲朝廷羞者。足下也。春秋之法。責賢者備。今某區區猶望足下之能一言者。不忍便絕。足下而不以賢者責也。若猶以謂希文不賢而當逐。則予今所言如此。乃是朋邪之人爾。願足下直攜此書於朝。使正予罪而誅之。使天下皆釋然。知希文之當逐。亦諫臣之一效也。前日足下在安道家。召予往論希文之事。時坐有他客。不能盡所懷。故輒布區區。伏惟幸察。不宣。

宋王安石上田正言第一書

正言執事。某五月還家。八月抵官。每欲介西北之郵。布一書道區區之懷。輒以事廢。揚東南之吭也。舟輿至自汴者。日十百數。因得問汴事與執事息耗甚詳。其間薦紳道執事介然立朝。無所跛倚。甚盛甚盛。顧猶有疑執事者。雖某亦然。某之學也。執事誨之進也。執事獎之。執事知某不爲淺矣。有疑焉。不以聞。何以償執事之知哉。初。執事坐殿廡下。對方正策。指斥天下利害。奮不諱忌。且曰。願陛下行之。無使天下謂制科爲進取一塗耳。方此時。窺執事意。豈若今所謂舉方正者。獵取名位而已哉。蓋曰。行其志。云爾。今聯諫官朝夕耳目。天子行事。卽一切是非。無不可言者。欲行其志。宜莫若此時。國之疵民之病。亦多矣。執事亦抵職之日久矣。向之所謂疵者。今或瘞然。若不可治矣。向之所謂病者。今或痼然。若不可起矣。曾未聞執事建一言。寤主上也。何向者指斥之切。而今之疏也。豈向之利於言。而今之言不利耶。豈不免若今之所謂舉方正者。獵取名位而已邪。人之疑執事者。以此爲

執事解者。或造辟而言。詭辭而出。疏賤之人。奚遽知其微哉。是不然矣。傳所謂造辟而言者。迺其言則不可得而聞也。其言之效。則天下斯見之矣。今國之疵民之病。有滋而無損焉。烏所謂言之效邪。復有爲執事解者。曰。蓋造辟而言之矣。如不用何。是又不然。臣之事君。三諫不從。則去之禮也。執事對策時常用是著於篇。今言之而不從。亦當不翅三矣。雖惓惓之義。未能自去。孟子不云乎。有言責者。不得其言則去。蓋亦辭其言責邪。執事不能自免於疑也。必矣。雖堅強之辯。不能爲執事解也。迺如某之愚。則願執事不矜寵利。不憚誅責。一爲天下昌言。以寤主上。起民之病。治國之疵。窳窳一心。如對策時。則人之疑。不解自判矣。惟執事念之。如其不然。願賜教答。不宣。

清多爾袞與明史可法書

予向在瀋陽。卽知燕京物望。咸推司馬。後人闢破賊。得與都人士相接。識介弟於清班。曾託其手勒平安。拳致衷緒。未審以何時得達。比聞道路紛紛。多謂金陵有

自立者。夫君父之讐。不共戴天。春秋之義。有賊不討。則故君不得書葬。新君不得書卽位。所以防亂。臣賊子法至嚴也。闖賊李自成稱兵犯闕。手毒君親。中國臣民。不聞加遺一矢。平西王吳三桂。介在東陲。獨效包胥之哭。朝廷感其忠義。念累世之宿好。棄近日之小嫌。爰整貔貅。驅除狗鼠。入京之日。首崇懷宗。帝后諡號。卜葬山陵。悉如典禮。親郡王將軍以下。一仍故封。不加改削。勳戚文武諸臣。咸在朝列。恩禮有加。耕市不驚。秋毫無擾。方擬秋高。氣爽。遣將西征。傳檄江南。聯兵河朔。陳師鞠旅。戮力同心。報乃君國之讐。彰我朝廷之德。豈意南州諸君子。苟安旦夕。弗審事機。聊慕虛名。頓忘實害。予甚惑之。國家之撫定燕京。乃得之於闖賊。非取之於明朝也。賊毀明朝之廟。主辱及先人。我國家不憚征繕之勞。悉索敝賦。代爲雪恥。孝子仁人。當如何感恩圖報。茲乃乘逆寇稽誅。王師暫息。遂欲雄據江南。坐享漁人之利。揆諸情理。豈可謂平將以爲天塹。不能飛渡。投鞭不足斷流耶。夫闖賊但爲明朝崇耳。未嘗得罪於我國家也。徒以薄海同仇。特申大義。今若擁號稱尊。

便是天有二日。儼爲勅敵。予將簡西行之銳。轉旆東征。且擬釋彼重誅。命爲前導。夫以中華全力。受制潢池。而欲以江左一隅。兼支大國勝負之數。無待著龜矣。予聞君子之愛人也以德。細人則以姑息。諸君子果識時知命。篤念故主。厚愛賢王。宜勸令削號歸藩。永綏福祿。朝廷當待以虞賓。統承禮物。帶礪山河。位在諸王侯上。庶不負朝廷伸義討賊。興滅繼絕之初心。至南州羣彥。翩然來儀。則爾公爾侯。列爵分土。有平西之典例。在惟執事實。圖利之輓近。士大夫好高樹名義。而不顧國家之急。每有大事。輒同築舍。昔宋人議論未定。兵已渡河。可爲殷鑑。先生領袖名流。主持至計。必能深維終始。寧忍隨俗浮沈。取舍從違。應早審定。兵行在即。可西可東。南國安危。在此一舉。願諸君子同以討賊爲心。毋貪一身瞬息之榮。而重故國無窮之禍。爲亂臣賊子所笑。予實有厚望焉。記有之。惟善人能受盡言。敬布腹心。佇聞明教。江天在望。延跂爲勞。書不宣意。

清侯方域癸未去金陵日與阮光祿書

僕竊聞君子處己不欲自恕。而苛責他人以非其道。今執事之於僕。乃有不然者。願爲執事陳之。執事僕之父行也。神宗之末。與大人同朝。相得甚歡。其後乃有欲終事執事而不能者。執事當自追憶其故。不必僕言之也。大人削官歸。僕時方少。每侍未嘗不念執事之才。而嗟惜者彌日。及僕稍長。知讀書。求友金陵。將戒途。而大人送之曰。金陵有御史成公勇者。雖於我爲後進。我常心重之。汝至當以爲師。又有老友方公孔炤。汝當持刺拜於牀下。語不及執事。及至金陵。則成公已得罪。去。僅見方公。而其子以智者。僕之夙交也。以此晨夕過從。執事與方公同爲父行。理當謁。然而不敢者。執事當自追憶其故。不必僕言之也。今執事乃責僕與方公厚。而與執事薄。噫。亦過矣。忽一日。有王將軍過僕。甚恭。每一至。必邀僕爲詩歌。既得之。必喜。而爲僕貰酒。奏伎。招遊舫。攜山屐。殷殷積旬不倦。僕初不解。旣而疑問將軍。將軍乃屏人以告僕曰。是皆阮光祿所願納交於君者也。光祿方爲諸君所詬。願更以道之。君之友陳君定生。吳君次尾。庶稍滿乎。僕斂容謝之曰。光祿身

爲貴卿。又不少佳賓。客足自娛。安用此二三書生爲哉。僕道之兩君。必重爲兩君。所絕。若僕獨私從光祿遊。又竊恐無益。光祿辱相款。八日。意良厚。然不得不絕矣。凡此皆僕平心稱量。自以爲未甚太過。而執事顧含怒不已。僕誠無所逃罪矣。昨夜方寢。而楊令君文驄叩門過僕。曰。左將軍兵且來。都人洶洶。阮光祿颺言於清議堂云。子與有舊。且應之於內。子盍行乎。僕乃知執事不獨見怒而且恨之。欲置之族滅。而後快也。僕與左誠有舊。亦已奉熊尚書之教。馳書止之。其心事尙不可知。若其犯順則賊也。僕誠應之於內。亦賊也。士君子稍知禮義。何至甘心作賊。萬一有焉。此必日暮途窮。倒行而逆施。若昔日乾兒義孫之徒。計無復之。容出於此。而僕豈其人耶。何執事文織之深也。竊怪執事常願下交天下士。而展轉蹉跎。乃至嫁禍而滅人之族。亦甚違其本念。倘一旦追憶天下士所以相遠之故。未必不悔。悔未必不改。果悔且改。靜待之數年。心事未必不暴白。心事果暴白。天下士未必不接踵而至。執事之門。僕果見天下士接踵而至。執事之門。亦必且隨屬。其後

長揖謝過。豈爲晚乎。而奈何。陰毒左計。一至於此。僕今已遭亂無家。扁舟短棹。措此身甚易。獨惜執事伎機一動。長伏草莽。則已。萬一復得志。必至盡殺天下士。以酌其宿所不快。則是使天下士終不復至執事之門。而後世操簡書以議執事者。不能如僕之詞微而義婉也。僕且去。可以不言。然恐執事不察。終謂僕於長者傲。故敢述其區區。不宣。

清劉嗣綰貽友人書

長江帆駛。聞在杪秋。道出鳩茲。冀展良覲。比奉故人告。知足下因舉孝廉。方正迫於歸里。足下名場坐困。垂二十年。倚閭之望。未知所慰。竊體介母求祿之意。冀遂毛生捧檄之願。足下之心亦良苦矣。顧進退出處所當三思。古者周崇六行。仁讓同興。漢制十科。賢良並策。朝重端門之典。世高講幄之風。大儒循吏。鮮不由此。方郡邑之舉也。足下當固辭。不能以曹邱之揚。自解於毛遂之薦也。且名者實之賓也。誠使素履有孚。嘉遯無悶。歸厚之門。昔人所旌。通德之里。過者猶式。如徒以名

焉而已。季良名流取之。以誡子弟。公謹才士黜之。以懲風俗。彼葉公所好之龍騰笑乎。公卿羊公不舞之鶴。貽嗤乎賓客。由來舊矣。夫人卽至。哲必不能掩己之短。以兼人之長。人卽至愚。亦必不肯棄其所工。而用其所拙。今足下既不獲焚棄筆硯。删除詞藻。就繩墨之訓。務布帛之言。去文苑而入儒林。舍文章而談道德。則必至名實不相符。言行不相顧。虛車不足以行遠。質鼎不足與入廟。繫而無用。致歎匏瓜。華而不實。貽譏桂樹。若足下者。爲麒麟之棺。耶。爲鸚鵡之車。耶。僕竊爲足下不取也。僕學植未成。行能無算。前望修途。茫無所託。願以知交之雅。聊盡忠告之道。薺甘荼苦。鑒此區區。足下勿濫南郭之吹。免貽北山之笑也。幸甚。

清黃安濤覆友人商游幕書

書來知艱於家食。欲爲遠遊。猥荷垂詢。無任翹企。僕服官中外。越二十年。於世態之炎涼。名場之向背。吏嘗腹飽。情狀日存。惟勞者之善歌。亦心拙之語疾。出門非易行路。誠難莫贈。繞朝之鞭。敢斷郵棠之鞅。所期貢懶。未遑擇言。夫以州郡之職。

民社是膺。待飭宮常端資幕畫。刑名爲生命所繫。錢穀爲國用所關。佐理需材。於斯爲重。未嘗肆業。敢信操刀。至於朱出墨入。分勞判牘之餘。日計月要。從事催科之末。此胥吏所勝任。非賢者所屑爲。若夫陳孔璋之典記。何長瑜之授書。才倚清高。職殊卑冗。然而膠西就曹參之舍。有俟避堂。遼東候王烈之來。亦嘗虛館。莫爲隗始。焉有觸前君子。於以待時。幽人所由履。素者也。抑古人開閣招賢。迎門下士。登龍者昂首攀驥者翹心。自君嗣倦於延賓。正平因而滅刺。接納無望。欬唾無聞。由是欣然來者。廢然返爾。更有按劍投珠。好竽操瑟。文若班揚之富。書如崔蔡之工。祇以自怡。不堪持贈。語君素業。喻彼白雲。且嘗見蹇然當官者。劇於酬應。勤於奉職者。困於趨承。當其彈冠之始。捧檄之初。薦剡之書。密如束筍。曳裾之輩。多於鯽魚。則有視分誼爲去留。以勢利爲進退。緇衣授粲。詎出好賢之誠。驪駒在門。卽爲逐客之令。其或徇情維繫。屈意周旋。外示優容。中懷厭薄。歌彈長鋏。敢希孟嘗之上。廚館以下。賓不與車。公之盛坐。猶乃苦戀雞肋。甘居牛後。失其本心。誠無謂。

也。況乎依彼門牆。仰人眉宇。分疏節闊。趾高氣揚。密昵因而間之。厮養得而輕之。苟非降心以從。安見藏身之固。遂使將軍揖客抗禮。輿臺元龍。俊人斂豪。湖海不得已也。自好羞之。至於公衙如傳舍。宦海如浮萍。遷徙無常。升沈靡定。朝榮夕悴。紅蓮等於舜華。乍滿旋除。淥水比之溝澮。當其得地。則公儲給以修羊。及其失時。則旅人喪其資斧。異九耕而三食。類一暴而十寒。因人而熱。其足恃乎。惟是達識罕逢。俗情多鄙。逐逐趨炎之地。滔滔入幕之賓。託廣廈以庇寒。向監河而貸粟。聚如螻附。翕若蠅翔。招之使來。豈官真腐物邪。若夫仲叔之於故人。不以豬肝爲累。僧珍之於族子。遺其葱肆。速歸豈矯情哉。良有以也。足下枕善而居。抱獨而處。游與鹿豕爲伍。食羞雞鶩之爭。徒以累有妻孥。儲無儋石。株難困守。出被饑驅。所嗟天壤茫茫。遊將安適。人寰落落。誰則相須。蓋惟直道而行。固與時宜不合也。始因窮而變計。繼因變而愈窮。與其舍舊而圖新。曷若蹈常而襲故。筆耕墨耒。自可逢年。馬磨牛醫。無傷溷俗。傳經鄉塾。或應童蒙之求。言志農山。或爲多財之宰。聊以

卒歲若將終身。詩云：聽用我謀，庶無大悔。竊附斯義，偷鑒愚衷。

清王詒壽與友人書

一昨二三知己，小飲江樓。爭席有鷗，蒸壺如鴨。解襟促坐，銜杯劇談。遂乃感世路之多艱，恨孤蹤之安託。酒薄不醉，卿言始愁。而足下獨軒眉鼓氣，謂士不得志，退求一職，亦可自奮於功名之途。不則游謁可致五侯之鯖，幕府可索千金之聘。天空任飛，吾何慮焉。僕當時墨然意倦，不復置喙。夕而思之，足下坐臥闐闐，雄長婢僕，足不出里閭，夢不涉都會。其不識世路之難，誠無足怪也。僕則橐筆半生，知之熟矣。知而不言，足下將終無由悟。則請卽昨所言之三者而述之。夫相如逸才，入資乃登郎署。崔烈名士，進錢以拜司徒。階身之污，古所不免。自視冠軒爲利途，遂以金資博孤注。黃綬長吏，碧衫枝官。和嶠之籠朝探，毛義之檄夕下。媚狐兩腳，神龜萬鑽。槐柳齊行，尖錐競巧。彼方謂筵前舞袖，非無長信之猴。坐上金籠，不少大卿之鵠。朝賢尙爾，我輩何傷。乃視摯詔爲本然，置恥辱於不問。其術之售者，或且

得恣其威福。望若神仙。而二三骨鯁之士。轉乃落莫無徒。是非衡鑒者之不明。黜
陟者之鮮當。良以孕蘭一萼。蔽髮蔓而不芳。積沙百斛。藏寸璧而莫見。吾與子側
足其間。固將羣睡之爲不祥。力排之使失所。鳳皇萬仞。安知匹雛。孔鸞失勢。不及
纖翮。此仕宦之事。爲今之所難也。吹笙楚國。墨子不損其賢。懷刺洛下。禰生不抑
其氣。踵門投謁。自昔而然。服紱蘭之奇服。冠切雲之高冠。上書荊州之門。長揖李
膺之坐。草賦朱閣。節帥傾心。陳詩鐵門。先達倒屣。長安如燕之客。終致青雲。車前
雕龍之書。乃騰隆望。天下大矣。詎無知音。文章有神。亦堪吐氣。乃者曳裙下客。伺
門鄙儒。立馬廡而不慙。望車塵而卽拜。殘羹冷炙。甘之如飴。金錯素縑。匄之無節。
獻錦賤之七字。但解揄揚。承華屋之一言。如膺詔命。自處旣鄰于廝下。視者亦比
之賤。傭居元龍百尺之樓。設下牀以待客。享季子五鼎之奉。進脫粟以餐。寶浸成。
貴倨之風。遂短名流之氣。昔者趙壹窮鳥傲郡守。以尺書元度。素筆敝軍門。而索
刺行之。今日叱逐隨之。此干人之事。又今之所難也。孔侯嘉邈。終應安東之招。樊

川清狂乃管奇章之記。士有抱靈芬附垂翅蓬池。幕府之依亦固其所。然而重之。以弓旌遇之。以國士昔有其事。今無其人。以彼穹階高據。繡袞儼然。或署牘尾之名。但知金屋。或判祠曹之牒。不解龍星。以文士爲可輕。以辭翰爲未務。但看鸞墨。光滿絳霞之牋。安識龍章。出自雲梭之軸。作黃江夏腹中之語。何論鸚母高才。得溫子昇海內之英。乃屈馬坊賤客。是何怪乎。翩翩俊彥。矯矯清才。甘臥窮谷之中。恥作侯門之客。故雖有名卿秉節。思播宏風。或且因鷓鴣之不逢。亦羔雁之禮絕。此依人之事。又今之所難也。嗟乎。滿目江山。何處平原之飲。半生肝膽。惟傾燕市之徒。白日輪馳。金門天遠。餓麟不噬。窮媛安投。我方深其隱憂。子乃恃以無恐。是何異涉一尺之波。而忘八節之險。守十步之室。而味九折之危者乎。足下休矣。其幸毋以吾言爲過情。而以康莊視荆棘也。惟覽不宣。

清趙銘上薛慰農夫子書

七月之望。朱仙鎮營次。得子琴書。敬悉夫子言辭珂里。安抵武林。露冕而來。還吾

父母星輅再出。望若神仙。父老既願借寇。君童子亦爭迎郭。伋而談者謂引疾未起。乞退猶堅。遠道聞之。私心異甚。竊以出處之際。道有權衡。推挽之功。責歸賢達。然古人辭三旌之召。謝列郡之榮。輒有故吏上牋。門生奏記。蓋謂勤身以濟物。猶愈養德以待時。銘雖不才。敢附斯義。夫使仕塗柄鑿。賢路崎嶇。而欲令俯仰若桔。棹嬉戲隨竿。木識者憇焉。側聞伏波老成。茂宏名士。有側席相延之雅。有同舟共濟之情。似可虛與委蛇。不隨軒輊。承天心之優眷。卜吾道之大光。魏闕子。牽終拂衣。而未忍西湖白傅。雖去郡以難忘。此其可酌者一也。夫玉經躬佩。倍切摩挲。花以手栽。尤勤愛護。況士經敦琢。疇被沾漑者乎。今者之江上下。浙水東西。一聞夫子之來。而庀廈者雲趨。攀轅者霧集。靡不謂照臨白璧。秋月長輝。問訊甘棠。東風又到。文翁留蜀。將貢士於西京。汲黯過齊。復活人於東海。我夫子樹人歲積。穀我恩多。得勿戀此蒼生。起紓赤芾乎。此其可酌者二也。時事孔棘。謀夫不臧。而賢者忽臨宦海。而抽帆回天衢。而戢軌。遂有深林招隱。異地借才者。假使鄰疆一疏。特

起東山明詔十行重頒北闕斯時欲去而湖山難別欲留而車乘方招豈知便著
羊裘興耽江上卽穿布襪情在雲門非徒香火之緣深實係生靈之望久此其可
酌者三也昔石湖以病起句祠坡老以晚年乞郡非關戀祿少緩歸田誠以月廩
歲餼有所不獲已也我夫子在官無五十畝之秫還家乏八百株之桑塵釜常懸
山資莫辦未免對芟衣而驚笑披蕙帳而猿愁然則無慕鶴軒有情鶯粒調停五
馬慰賓客之飄零鄭重六條誠公侯之逸豫夫亦何損高致乎此其可酌者四也
大抵往來者運也隱見者遇也油雲作霏可與絳霄爲舒卷明月出海或遇清風
而徘徊以證詩懷兒瀟灑焉以徵宦隱見從容焉況我夫子循吏之聲縈回宸聽
儒林之業黼黻皇猷一旦聖天子寵之藩翰申以封圻不待再計而起矣豈必煙
霞永契松菊堅盟薄壯歲之功名樂古賢之嘯傲與銘東游旣倦南歸未能方春
從曹濟之征冒暑有歸陳之役草行水涉歷千里以云勞車殆馬煩閱三時而未
已短衣自笑秃筆難豪旣鬢髮之早衰復音書之多滯十口家累西風漸寒一笏

墓田。終夜欲涕。擬俟梅花開日。春水生時。乞假治裝。還鄉釋服。晉謁夫子於西冷。定知絳帳玄亭。三生有幸耳。芻蕘可獻。請據弟子之誠。葑菲不遺。謹俟先生之教。敬頌起居。伏希鑒察。

(庚)慰藉

古者列國有難。進書弔慰。循而推之。綢繆倫好。蠲祓佗僚。其上者開示理勢。盡利盡曠。其次者莊論俳語。亦足以開拓心胸。故知文字之用。勝於萱蘇矣。共錄六首。

晉陸雲答車茂安書

雲白。前書未報。重得來況。知賢甥石季甫。當屈鄧令。尊堂憂灼。賢姊涕泣。上下愁勞。舉家慘感。何可爾耶。輒爲足下。具說鄧縣土地之性。非徒浮言華豔而已。皆有實徵也。縣去郡治。不出三日。直東而出。水陸並通。西有大湖。廣縱千頃。北有高山。南有林澤。東臨巨海。往往無涯。汎船長驅。一舉千里。北接青徐。東洞交廣。海物惟錯。不可稱名。遏長川以爲陂。燔茂草以爲田。火耕水種。不煩人力。決泄任意。高下

在心舉。鉞成雲。下鉞成雨。既浸。既潤。隨時代。序官無滯。之穀民無饑乏之慮。衣食常充。倉庫恆實。榮辱既明。禮節甚備。爲君甚簡。爲民亦易。季冬之月。收穫既畢。嚴霜隕而蒹葭萎。林鳥祭而罽羅設。因民所欲。順時遊獵。結罝繞岡。密罔彌山。放鷹走犬。弓弩亂發。鳥不得飛。獸不得逸。眞光赫之觀。盤戲之至樂也。若乃斷邊海。浦隔截。曲隈隨湖。進退采蚌。捕魚鱸。鮪赤尾。鮎齒比日不可紀名。鱸鱠。鮓炙。蠶鮓。烝石。首臠。蝨。蠶。眞東海之俊味。肴膳之至妙也。及其蚌蛤之屬。目所希見。耳所不聞。品類數百。難可盡言也。昔秦始皇至尊至貴。前臨終南。退燕阿房。離宮別館。隨意所居。沈淪涇渭。飲馬昆明。四方奇麗。天下珍玩。無所不有。猶以不如吳會也。鄉東觀滄海。遂御六軍。南巡狩。登稽嶽。刻文石。身在鄆縣。三十餘日。夫以帝王之尊。不憚爾行。季甫年少。受命牧民。武城之歌。足以興化。桑弧蓬矢。丈夫之志。經營四方。古人所歎。何足憂乎。且彼吏民。恭謹篤慎。敬愛官長。鞭扑不施。聲教風靡。漢吳以來。臨此縣者。無不遷變。尊夫人賢姊上下。當爲喜慶。歌舞相送。勿爲慮也。足下

急啟喻寬慰。具說此意。吾不虛言也。停及不一。陸雲白。

唐韓愈與崔羣書

自足下離東都。凡兩度枉問。尋承已達。宣州主人仁賢。同列皆君子。雖抱羈旅之念。亦且可以度日。無入而不自得。樂天知命者。固前修之所以禦外物者也。況足下度越此等百千輩。豈以出處近遠累其靈臺耶。宣州雖稱清涼高爽。然皆大江之南。風土不並以北將息之道。當先理其心。心閒無事。然後外患不入。風氣所宜。可以審備。小小者亦當自不至矣。足下之賢。雖在窮約。猶能不改其樂。況地至近。官榮祿厚。親愛盡在左右者邪。所以如此云云者。以爲足下賢者宜在上位。託於幕府。則不爲得其所。是以及之。乃相親重之道耳。非所以待足下者也。僕自少至今。從事於往還朋友間。一十七年矣。日月不爲不久。所與交往相識者千百人。非不多。其相與如骨肉兄弟者。亦且不少。或以事同。或以藝取。或慕其一善。或以其久故。或初不甚知。而與之已密。其後無大惡。因不復決捨。或其人雖不皆入於善。

而於己已厚。雖欲悔之不可。凡諸淺者固不足道。深者止如此。至於心所仰服。考之於行。而無瑕。尤窺之閫奧。而不見畛域。明白淳粹。輝光日新者。惟吾崔君一人。僕愚陋無所知曉。然聖人之書。無所不讀。其精粗巨細。出入明晦。雖不盡識。抑不可謂不涉其流者也。以此而推之。以此而度之。誠知足下出羣拔萃。無謂僕何從而得之也。與足下情義。寧須言而后自明邪。所以言者。懼足下以爲吾所與深者多。不置白黑於胸中耳。既謂能粗知足下。而復懼足下之不我知。亦過也。比亦有人說足下誠盡善盡美。抑猶有可疑者。僕謂之曰。何疑。疑者曰。君子當有所好惡。好惡不可不明。如清河者。人無賢愚。無不說其善。伏其爲人。以是而疑之耳。僕應之曰。鳳凰芝草。賢愚皆以爲美瑞。青天白日。奴隸亦知其清明。譬之食物。至於遐方異味。則有嗜者。有不嗜者。至於稻也。粱也。膾也。彘也。豈聞有不嗜者哉。疑者乃解。解不解於吾。崔君無所損益也。自古賢者少。不肖者多。自省事已來。又見賢者恆不遇。不賢者比肩青紫。賢者恆無以自存。不賢者志滿氣得。賢者雖得卑位。則

旋而死。不賢者。或至眉壽。不知造物者。意竟如何。無乃所好惡。與人異心哉。又不知無乃都不省記。任其死生。壽夭邪。未可知也。人固有薄卿相之官。千乘之位。而甘陋巷菜羹者。同是人也。猶有好惡如此之異者。況天之與人。當必異其所好惡。無疑也。合於天。而乖於人。何害。況又時有兼得者。耶。崔君。崔君。無怠無怠。僕無以自全活者。從一官於此。轉困窮甚。思自放於伊潁之上。當亦終得之。近者尤衰憊。左車第二牙。無故動搖脫去。目視昏花。尋常間。便不分人顏色。兩鬢半白。頭髮五分亦白其一。鬚亦有一莖兩莖白者。僕家不幸。諸父諸兄。皆康彊早世。如僕者。又可以圖於久長哉。以此忽忽。思與足下相見。一道其懷。小兒女滿前。能不顧念。足下何由得歸北來。僕不樂江南。官滿。便終老嵩下。足下可相就。僕不可去矣。珍重自愛。慎飲食。少思慮。惟此之望。愈再拜。

唐柳宗元賀進士王參元失火書

得楊八書。知足下遇火災。家無餘儲。僕始聞而駭中。而疑終。乃大喜。蓋將弔而更

以賀也。道遠言略。猶未能究知其狀。若果蕩焉。浪焉。而悉無有。乃吾所以尤賀者也。足下勤奉養。樂朝夕。惟恬安無事。是望也。今乃有焚煬赫烈之虞。以震駭左右。而脂膏滄瀼之具。或以不給。吾是以始而駭也。凡人之言。皆曰盈虛倚伏。去來之不可常。或將大有爲也。乃始厄困震悸。於是有水火之孽。有羣小之慍。勞苦變動。而後能光明。古之人皆然。斯道遼闊。誕漫。雖聖人不能以是必信。是故中而疑也。以足下讀古人書。爲文章。善小學。其爲多能若是。而進不能出羣士之上。以取顯貴者。蓋無他焉。京城人多言足下家有積貨。士之好廉名者。皆畏忌不敢道足下之善。獨自得之心。蓄之。銜忍而不出諸口。以公道之難明。而世之多嫌也。一出口則嗤嗤者。以爲得重賂。僕自貞元十五年。見足下之文章。蓄之者。蓋六七年。未嘗言。是僕私一身而負公道久矣。非特負足下也。及爲御史尙書郎。自以幸爲天子近臣。得奮其舌。思以發明足下之鬱塞。然時稱道於行列。猶有顧視而竊笑者。僕良恨修己之不亮。素譽之不立。而爲世嫌之所加。常與孟幾道言而痛之。乃今幸

爲天火之所滌盪。凡衆之疑慮。舉爲灰埃。黔其廬。赭其垣。以示其無有。而足下之才能。乃可以顯白而不污。其實出矣。是祝融回祿之相。吾子也。則僕與幾道十年之相知。不若茲火一夕之爲足下譽也。宥而彰之。使夫蓄於心者。咸得開其喙。發策決科者。授子而不慄。雖欲如嚮之蓄縮受侮。其可得乎。於茲吾有望於子。是以終乃大喜也。古者列國有災。同位者皆相弔。許不弔災。君子惡之。今吾之所陳。若是。有以異乎。古故將弔。而更以賀也。顏曾之養。其爲樂也大矣。又何闕焉。足下前要僕文章古書。極不忘。候得數十幅。乃併往耳。吳二十一武陵來。言足下爲醉賦。及對問。大善。可寄一本。僕近亦好作文。與在京城時頗異。思與足下輩言之。極枯甚。固未可得也。因人南來。致書訪死生。不悉。宗元白。

清袁枚慰蔣用菴侍御失火書

公子來。接手書。知先生名由副墨。已爲六丁所收。北闕由車。更爲五酉所尼。嘻。其酷矣。僕不獲執鐸。將擬作公孫之侍。又不能反風噴水。表郭憲之心。敬以殘客之

卮言博達人之莞爾。蓋聞火也者。於水爲妃。無平不陂。在夏爲孝。其危乃光。是以
梁燬浮圖。武帝以爲道高魔盛。魯焚宣榭。何休以爲黜祀新周。老物晉存。燈常青
而不滅。霸圖吳就。璧雖亦以何妨。王敬則捧紗帽以呼。事須及熱。韓安國對田甲
而笑。灰寧不然。先生以霜後之松筠。作焚餘之圭璧。紅羊劫。小白撰家。空幸草雖
存。勞薪已盡。未免蕭邱性冷。炎上心孤。然而浹目而遇七十二毒者。神農之嘗草
也。鑄財而燒三十六鑪者。冥司之懺除也。造化陋人。必極之於既往。相風測景。當
覘乎其所將。玄冥祝融。時相爲帝。桃笙葵扇。事豈有常。子惻被賣於渠公。乘車食
肉。墨子跌躓於楚國。錦衣吹笙。海三凍於慕容之朝。山一飛於身毒之國。動將靜
轉。晦與明通。胥蟹之機。由來久矣。而況火原號聖。烟亦稱祥。井絜郊天。庭燎華國。
管氏祓燿。而作相衛侯。名燬以興邦。豈非鼎彰調燮之功。離本文明之象哉。先生
內學七緯。旁通三微。千樹逞能。五神開教。清談而熒惑。退舍鑄詞。則蛟龍捧鑪。謝
玄之皮屐安櫛。必教得所。諸葛之藩籬亭障。雅有精思。子玉賓朋。時夸過菜。楊惇

袍袴都是內裁。方將耀山甫之將明。展子培之穆行。鞭笞鮭觥。揖讓夔龍。而乃眼熱牢盆。東壁有餘光之乞。釁生禺筮。西鄰非禴祭之時。遂致木燧乍鑽。而融風反逼。紅霞未嚼。而赤舌先燒。象無齒以身焚。魚在池而殃及。二卵之罰嚴矣。三錢之府閉矣。海內憐之。思舉旛以留賢。士林惜之。謀束緼以還婦。誰知先生三世長者。深知服食之方。半生王門。未領煙霞之樂。一旦脫鞵解紉。陰喝迎涼。還桑梓若龍荒。笑伊呂爲筮庫。三千太學。請叔夜爲師。九萬巴箋。待羲之染翰。巡狩有典。半皆應劭之文章。作奏雖工。不署馬周之名。姓笙清簧。撥絃愛火。鳳之聲炙。鵠烝。鳧享客鬪。焯人之妙。幾幾乎龍叔方寸。日映皆空。許由一瓢。風吹不動矣。天以爲阮瑀。不出當焚山以求之。張昭不朝。當燒門以脅之。與其玄纁作聘。不如朱鳥催裝。與其國主持鞭。不若炎官張繖。於是司烜戒令。闕伯前驅。百蟲將軍。煥然烈澤。黃車使者。爛其盈門。絳雲起而捲霄。畢方飛而升屋。焚來諫草。都作赤章。取去易牕。將鑄碧落。寒山龍繩。爭彩筆之光芒。太乙青藜。搜庸成之册府。荅頭孔履。武庫存

無虹靄霓旌。安公來否。必使焦土無立錐之地。而後文星還小謫之天。譬如度尙
焚營。兵纔前進。耿純燒舍。戰乃成功。蓋沈檀非燕。則不香。鷹隼因驚。而愈奮也。當
此之時。先生無心炊。累商邱。出入煙中。抱德煬和。姚光高坐。火上亦曾憶及。隨園
燈宴。紙醉金迷。有个故人。鳶肩火色。乎所望。收回餘燼。不諱熱中。應卜楚燔。印烘
夏縵。法非東漢。罷官可入京師。壽祝南山。高爵應歌天保。皇上聖恩。似海燭。照常
寬。公卿知己。如麻。編秆必助。金天作頌。非王融。其誰能。玉牒封山。得相如。而輒賞。
將見。蒸出芝菌。收之桑榆。燃石冷。而重溫。蜀井窺。而再燄。不必東煬。齊竈。西祀盤。
庚。而早見。鐵柱彈冠。鳳池還汝。僕與先生。心期廿載。賦別三年。飲共燒蘭。痛分灼。
艾。乃趙佗。有風聞之信。謂李斯在逐客之中。不知僕雖禿。炷之年。不畏赤燦之怒。
突薪易徙。冰蘂難焦。能與雞談。不嫌鷲傲。射三發。而皆遠許。爲劍再舞。而不及劉。
季。亦猶沃焦山大。受海水。以皆消。螢火丸空。當刀兵而悉度。早服飛霜之散。何勞。
撒屋之防。先生來書。問季豹之生。無念西施之網。未則又不知。嗚谷將沈。趙無炊。

種。暉。臺。已。暮。莊。不。傳。薪。妖。鳥。空。鳴。伯。姬。呼。而。不。至。豔。妻。難。煽。祆。廟。禱。而。無。徵。宵。明。燭。光。豈。貧。家。之。肯。降。頽。陽。晚。照。悵。行。樂。之。無。期。惟。有。顏。叔。灰。心。稱。貞。縮。屋。高。車。生。女。築。臺。配。天。而。已。至。於。傳。張。翰。之。下。金。昌。累。椒。鳴。之。迎。境。上。則。頗。似。葵。臺。搏。影。丹。穴。尋。聲。處。處。庾。冰。人。人。元。化。由。欽。遲。之。念。切。致。閃。掄。之。惑。深。也。不。然。僕。學。幻。有。年。隱。形。無。術。蘭。陵。非。朝。歌。之。地。何。必。回。車。嵇。呂。雖。千。里。之。遙。尙。將。命。駕。豈。有。麾。左。師。之。短。策。過。華。臣。之。門。而。必。奔。撤。三。輔。之。長。裾。當。季。長。之。室。而。不。入。者。哉。小。舒。結。轡。折。此。疏。麻。寫。成。父。之。賀。書。爲。君。解。崇。當。陸。渾。之。高。咏。一。笑。臨。風。

清張裕釗與張煦堂大令書

前數日閱邸鈔。知以被議左遷。爲之惋愕無已。不謂足下事遂乖舛至此也。人生所遇通塞。固不可以常理論。或材行志節。出於人人。而困阨沈淪。不得行其志。或錄錄無所短長。比肩尊官顯秩。賢人君子。俯首噎氣。餘侘不敢出一語。其不肖之徒。庸虛鬼瑣之醜類。乘機冒進。舉生倖心。人自期以方面公輔。芒不復有闔域制。

限於是乃蠲棄廉恥相奔於邪徑幽竇抵死并入以求得之雖然其遂以是顯蹟
身敗而名裂者亦不可勝數也且所謂一意自守不肯少貶以阿世俗而卒躋通
顯者抑豈獨無其人邪屈信存亡之際是有天焉非人之所能爲也故曰莫之爲
而爲者天也天故不可得而知也且嘗試獨居安度自天地剖判至今且千萬歲
天亦稍衰且老矣固時不免朦瞶昏亂其所處是非臧否以施愛憎賞罰亦豈信
能盡其理邪夫天處高而人錯居其下而權命一懸寄焉又時不免昏亂錯逆則
夫人之所謂窮通得失廢興者譬猶深夜瞑目繫手以走曠閭之虛夷險一惟所
值焉斯已耳其又孰從而意之邪足下質直勁正出於天亮又達於當世之務宜
在顯位施澤於當世者也其至是命也然使命不終否復進而上一反手間耳亦
莫知其爲之者也正己以俟之而已矣羅少村都轉常晤見否恩恩未及作書請
以此示之使聞狂言取一笑爲快不足令他人見也

清張裕釗答李佛笙太守書

价至奉讀手書爲之感歎無已及讀所示大箴則又大喜且詫不謂足下銳進一至此也來書謂此行誠失計然獲交不肖時相從問得學問文章之要指挈長度短固亦未爲失裕釗豈敢任此顧足下之文乃精進若是則信所得多矣文誠出於人人足以信乎今而傳乎後窮之百世而自必其不磨雖百郡守不以易也且所謂窮通得喪愉戚寒飢溫飽者擾擾一旦暮之事耳何足道哉何足道哉知足下故必不以一官置意中然卽爲衣食計則亦有命焉力所能謀謀之所不能謀則聽之而已固亦不足恤也裕釗曷時讀論語獨深有契於孔子不知命無以爲君子之一言且嘗試縱觀生民之初以至今日盛衰倚伏與夫人之賢不肖芒乎紛乎眇不可紀極終其興若廢有一之非其命者邪或乃弃其修行立名所得自爲之事奔耑騁欲一切以徼非望卒泯泯以沒身甚且爲詬於天下後世者甚可悲也既亮識其然又自少酷嗜學問文章是以一意專精於此而不遑恤其他惟是年齒日長神智日耗恐遂終無所就時獨以爲懼近者撰得書元后傳後一篇

乃忽妄得意自以甚近似西漢人。且私計國朝爲古文者。惟文正師吾不敢望。若以此文校之方姚梅諸公。未知其孰先孰後也。雖則狂謬至是。乃復私自疑。輒錄寄足下。爲我一決其然否。其然邪。是吾益也。用竊自憚也。不然邪。卻退矣。吾滋懼焉。請必明語我。俾得一自釋焉。抑以足下之果勢勇銳。若是使由是屏弃百爲。以從事於斯。且使裕釗駭憚畏避。而不敢與競也。承欲來爲一握手之歡。聞之喜怵無已。書不能盡意。俟爾時當極意一傾吐耳。

(辛)干謁 假今之人。曳裾侯門。馳書豪右。趨趨嚙嚙。曾不可以終日。何則。其氣茶也。醜醜應求。人生詎免。要之纏綿以盡致。慷慨以任氣。血誠可訴。而風骨不頹。文章於是爲不朽矣。昌黎明於事理。往復推勘。書牘尤長。而干謁諸作。讀之短氣。悉畀刊落。以崇體要。錄邱巨源江文通以下。凡十首。

齊邱巨源與尙書令袁粲書

民信理推心。闇於量事。庶謂丹誠感達。賞報辱期。豈虞寂寥。忽焉三稔。議者必云

筆記賤伎。非殺活所待。開勸小說。非舌判所寄。然則先聲後實。軍國舊章。七德九功。將名當世。仰觀天緯。則右將而左相。俯察人序。則西武而東文。固非胥祝之倫。伍巫匠之流匹矣。去昔奇兵。變起呼吸。雖凶渠卽剿。而人情更迷。茅恬開城。千齡出叛。當此之時。心齊胡越。奉迎新亭者。士庶填路。投名朱雀者。愚智空閨。人惑而民不惑。人畏而民不畏。其一可論也。臨機新亭。獨能抽刃斬賊者。唯有張敬兒。而中書省獨能奮筆弗顧者。唯有邱巨源。文武相方。誠有優劣。就其死亡。以決成敗。當崩天之敵。抗不測之禍。請問海內。此膽何如其二。可論也。又爾時顛沛。普喚文士。黃門中書。靡不畢集。擣翰振藻。非爲乏人。朝廷洪筆。何故假手。凡賤若以此賊。彊盛勝負。難測羣賢。怯不染毫者。則民宜以勇獲賞。若云羽檄之難。必須筆傑。羣賢推能。見委者。則民宜以才賜列。其三可論也。竊見桂陽賊賞不赦之條。凡二十五人。而李恆鍾爽。同在此例。戰敗後出罪。竝釋。然而吳邁遠族。誅之。罰則操筆大禍。而操戈無害。論以賞科。則武人超越。而文人埋沒。其四可論也。且邁遠置辭。無

乃侵慢民。作符檄肆言詈辱。放筆出手。卽就壙粉。若使桂陽得志。民若不轅裂軍門。則應腰斬都市。嬰孩脯膾。伊可熟念。其五。可論也。往年戎旅。萬有餘甲。十分之中。九分先隸。可謂衆矣。攀龍附鱗。翻焉雲翔。至若民狂夫。可謂寡矣。徒關敕旨。空然泥沈。詎其荷駭塵末。皆是白起操牘。事始必非魯連邪。民慎國算。迅足馳烽。旆之機。帝擇逸翰。赴廚糴之會。既能陵敵。不殿爭先。無負宜其微賜。存在少沾。飲斲遂乃棄之溝。閒如蟬如蟻。擲之言外。如土如灰。絳隸帖戰。無拳無勇。竝隨資峻級矣。凡豫臺內。不文不武。已坐拱清階矣。撫骸如此。瞻例如彼。既非草木。何能弭聲。

梁江淹詣建平王上書

昔者賤臣叩心。飛霜擊於燕地。庶女告天。振風襲於齊臺。下官每讀其書。未嘗不廢卷流涕。何者。士有一定之論。女有不易之行。信而見疑。貞而爲戮。是以壯夫義士。伏死而不顧者。此也。下官聞仁不可恃。善不可依。謂徒虛語。乃今知之。伏願大王暫停左右。少加憐察。下官本蓬戶桑樞之人。布衣韋帶之士。退不飾詩書。以驚

愚進不買名聲於天下。日者謬得升降承明之闕。出入金華之殿。何嘗不局影凝嚴。側身局禁者乎。竊慕大王之義。復爲門下之賓。備鳴盜淺術之餘。豫三五賤伎之末。大王惠以恩光。顧以顏色。實佩荆卿黃金之賜。竊感豫讓國士之分矣。常欲結纓伏劍。少謝萬一。剖心摩踵。以報所天。不圖小人固陋。坐貽譴。軼迹墜昭憲身限。幽囹履影。弔心酸鼻。痛骨下官。聞虧名爲辱。虧形次之。是以每一念來。忽若有遺。加以涉旬月。追季秋天光沈陰。左右無色。身非木石。與獄吏爲伍。此少卿所以仰天槌心。泣盡而繼之以血也。下官雖乏鄉曲之譽。然嘗聞君子之行矣。其上則隱於簾肆之間。臥於巖石之下。次則結綬金馬之庭。高議雲臺之上。退則虜南越之君。係單丁之頸。俱啟丹冊。並圖青史。寧當爭分寸之末。競錐刀之利哉。下官聞積毀銷金。積讒磨骨。遠則直生。取疑於盜金。近則伯魚。被名於不義。彼之二子。猶或如是。況在下官。焉能自免。昔上將之恥。絳侯幽獄。名臣之差。史遷下室。至如下官。當何言哉。夫魯連之智。辭祿而不返。摛輿之賢。行歌而忘歸。子陵閉關於東越。

仲蔚杜門於西秦亦良可知也若使下官事非其虛罪得其實亦當鉗口吞舌伏
匕首以殞身何以見齊魯奇節之人燕趙悲歌之士乎方今聖曆欽明天下樂業
青雲浮雒榮光塞河西泊臨洮狄道北距飛狐陽原莫不浸仁沐義照景飲醴而
已而下官抱痛圓門含憤獄戶一物之微有足悲者仰惟大王少垂明白則梧邱
之魂不愧於沈首鵠亭之鬼無恨於灰骨不任肝膽之切敬因執事以聞

陳徐陵與王僧辯書

昔者雲師火帝非無戰陣之風堯誓湯征咸用干戈之道至於搖山蕩海驅電乘
雷殲厥凶渠無虧皇極若夏鍾夷羿周厄犬戎漢委珠囊秦亡寶鏡然則皆聞之
矣未有膺龍圖以建國御鳳邸以承家二后欽明三靈交泰而天崩地坼妖寇橫
行者也自古銅頭鐵額興暴皇年檣杵窮奇流災中國王彌石勒吞噬關河綠林
青犢之羣黑山白馬之衆較彼兵荒無聞前史八王故事曾未混淆九州春秋非
云禍亂我皇受命中興光宅天下泰寧瑣瑣安敢執鞭建武栖栖何期扶轂抑又

聞之陶唐既作。天歸鳥喙之臣。豐畢將興。特挺鷹揚之佐。明公量苞金鉉。神表玉璜。補袞欽才。平階佇德。固以留連管樂。惆悵風雲。濡足維時。投竿斯在。去歲兇徒。不逞言次。巴邱鼓聲。聞一柱之臺。烽火照三休之殿。公則懸麾羽扇。猶對投壺。戎羯咸奔。黥鯢俱剪。樓船萬軸。還繫昆明。胡馬千羣。皆輸長樂。於是乎夏首西浮。雲行電邁。彭波東滙。谷靜山空。扼鵠尾而據王畿。登牛頭而掃天闕。漸臺僞帥。仍傳首於帝京。酈鳩元兇。咸剝腸於軍市。青羌赤狄。同畀豺狼。胡服夷言。咸爲京觀。公園陵盡拜。忠貫長沙。神主咸安。勳踰高密。重以秦宮。旣獲魯殿。猶存闢綠草於應門。開青槐於武庫。長安五陵之族。鄠杜七遷之民。襁負而歸。都麀斯滿。鬻脂藏脯。遊騎擊鐘。故市新城。飛藁華屋。東莞舊宅。人識桑榆。南頓荒田。家分禾黍。豈止鄉名。穀熟邑號。禾興而已哉。若夫卦起龍文。書因鳥跡。劬勞王室。大拯生民。自開闢以來。未之有也。雖十六才子。明允篤誠。八百諸侯。專心同德。中宗佐命。俱畫丹青。光武功臣。皆懸星象。棧道木閣。田單之奉霸齊。縮鬪將兵。周勃之扶強漢。壤蟲之

比黃鶴。轍鮒之仰。河宗未足云也。孤子階緣多幸。叨筮皇華。鄉國屯危。公私憔悴。邳彤之切。長亂心胸。徐庶之祈。終無開允。既而屏居空館。多歷歲時。釁犯幽祇。躬當剿滅。何圖釁咎。災極蒼旻。號慕煩冤。肝腸屠殞。酷痛奈何。無狀奈何。惟桑與梓。翻若天涯。杖栢栽松。悠然長絕。明明日月。號叫無聞。茫茫宇宙。容身何所。窮劇奈何。自忝膺嘉聘。仍屬亂離。上下年尊。偏嬰此酷。昔人迎門。請盜恆懷。廢寢之憂。當輓輿。纒猶有危途之懼。況乎逆寇崩騰。京師播越。興居動止。長隔山河。朝夕餽飽。誰經心眼。程麀不繼。原粟何資。瞻望風雲。朝夕嗚咽。固乃遊魂已謝。非復全生。餘息空留。非爲全死。同冰魚之不絕。似蟄蟲之猶蘇。良可哀也。良可哀也。自東都紹漢。南亳興殷。脩好徵兵。彌留星瑄。韓宣范武。方駕連鑣。蘇秦張儀。朱輪華轂。而孤子三危。是擯四罪。同科聽別。馬而長號。杖歸旂而永慟。王稽反命。既無託乘之恩。椒舉相逢。誰爲班荆之位。昔人違齊。處魯時降。徵求亡晉。奔秦猶蒙招請。問管寧於遼左。追王朗於浙東。並物譽時賢。卿門公族。懸須應務。深挾情祈。斯豈庸賤之

儔。耶。非。餘。生。之。敢。望。也。但。預。在。輜。軒。誠。爲。過。誤。珪。璋。特。達。通。聘。河。陽。貂。珥。雍。容。尋。盟。漳。水。差。有。黃。門。啟。封。非。無。青。紙。詔。書。郡。將。州。司。郊。迎。負。弩。鄉。亭。里。候。節。館。陳。兵。豈。是。復。介。而。奔。齊。寧。當。竊。妻。而。逃。晉。已。焉。哉。羌。難。得。其。言。也。漢。之。谷。吉。捐。軀。者。幾。人。楚。之。申。胥。埋。魂。者。何。地。孤。子。何。所。歎。焉。但。頓。伏。苦。廬。徒。延。光。晷。夫。以。喞。噍。鸞。雀。躑。躅。鳴。號。含。識。懷。靈。未。有。其。痛。且。夫。曾。耕。雨。雪。猶。尙。悲。歌。蘇。使。幽。囚。無。馳。哽。咽。公。履。忠。弘。孝。冠。冕。縉。紳。化。感。煙。雲。量。標。海。嶽。行。糜。仲。月。王。政。無。塞。分。穀。高。年。仁。風。則。遠。固。以。衣。纓。仰。訓。黎。庶。投。懷。今。日。懽。惶。彌。布。洪。澤。雖。復。孤。骸。不。返。方。爲。漠。北。之。塵。營。魄。知。歸。終。結。江。南。之。草。

唐李白與韓荊州朝宗書

白聞天下談士相聚而言曰。生不用封萬戶侯。但願一識韓荊州。何令人之景慕。一至於此邪。豈不以周公之風。躬吐握之事。使海內豪俊奔走而歸之。一登龍門。則聲價十倍。所以龍蟠鳳逸之士。皆欲收名定價於君侯。願君侯不以富貴而驕。

之寒賤而忽之則三千賓中有毛遂使白得脫穎而出卽其人焉白隴西布衣流
落楚漢十五好劍術徧于諸侯三十成文章歷抵卿相雖長不滿七尺而心雄萬
夫王公大臣許與氣義此疇曩心迹安敢不盡於君侯哉君侯制作侔神明德行
動天地筆參造化學究天人幸願開張心顏不以長揖見拒必若接之以高宴縱
之以清談請日試萬言倚馬可待今天下以君侯爲文章之司命人物之權衡一
經品題便作佳士而今君侯何惜階前盈尺之地不使白揚眉吐氣激昂青雲邪
昔王子師爲豫章未下車卽辟荀慈明既下車又辟孔文舉山濤作冀州甄拔三
十餘人或爲侍中尙書先代所美而君侯亦一薦嚴協律入爲祕書郎中閒崔宗
之房習祖黎昕許瑩之徒或以才名見知或以清白見賞白每觀其銜恩撫躬忠
義奮發白以此感激知君侯推赤心於諸賢之腹中所以不歸他人而願委身於
國士儻急難有用敢效微軀且人非堯舜誰能盡善白謨猷籌畫安敢自矜至於
制作積成卷軸則欲塵穢視聽恐雕蟲小技不合大人若賜觀芻蕘請給以紙筆

兼之書人。然後退埽閒軒。繕寫呈上。庶青萍結綠。長價於薛卞之門。幸推下流。大開獎飾。惟君侯圖之。

唐李白上安州裴長史書

白聞天不言而四時行。地不語而百物生。白人焉。非天地安得不言而知乎。敢剖心析肝。論舉身之事。便當談笑以明其心。而麤陳其大綱。一快憤懣。惟君侯察焉。白家本金陵。世爲右姓。遭沮渠蒙遜之難。奔流咸秦。因官寓家。少長江漢。五歲誦六甲。十歲觀百家。軒轅以來。頗得聞矣。常橫經籍詩書。制作不倦。迄於今三十春矣。以爲士生則桑弧蓬矢。射乎四方。故知大丈夫必有四方之志。乃仗劍去國。辭親遠遊。南窮蒼梧。東涉溟海。見鄉人相如。大誇雲夢之事。云楚有七澤。遂來觀焉。而許相公家見招。妻以孫女。便憩跡於此。至移三霜。焉曩昔東遊維揚。不逾一年。散金三十餘萬。有落魄公子。悉皆濟之。此則是白之輕財好施也。又昔與蜀中友人吳指南同遊於楚。指南死於洞庭之上。白禮服慟哭。若喪天倫。炎月伏屍。泣盡。

而繼之以血。行路聞者。悉皆傷心。猛虎前臨。堅守不動。遂權殞於湖側。便之金陵。數年來。觀筋骨尚在。白雪泣持刃。躬申洗削。裹骨徒步負之。而趨寢興。攜持無輟。身。手。遂。丐。貸。營。葬。於。鄂。城。之。東。故。鄉。路。遠。魂。魄。無。主。禮。以。遷。窆。式。昭。朋。情。此。則。是。白。存。交。重。義。也。又。昔。與。逸。人。東。巖。子。隱。於。岷。山。之。陽。白。巢。居。數。年。不。跡。城。市。養。奇。禽。千。計。呼。皆。就。掌。取。食。了。無。驚。猜。廣。漢。太。守。聞。而。異。之。詣。廬。親。觀。因。舉。二。人。以。有道。並。不。起。此。則。白。養。高。忘。機。不。屈。之。跡。也。又。前。禮。部。尙。書。蘇。公。出。爲。益。州。長。史。白。於。路。中。投。刺。待。以。布。衣。之。禮。因。謂。群。寮。曰。此。子。天。才。英。麗。下。筆。不。休。雖。風。力。未。成。且。見。專。車。之。骨。若。廣。之。以。學。可。以。相。如。比。肩。也。四。海。明。識。且。知。此。談。前。此。郡。督。馬。公。朝。野。豪。彥。一。見。盡。禮。許。爲。奇。才。因。謂。長。史。李。京。之。曰。諸。人。之。文。猶。山。無。煙。霞。春。無。草。樹。李。白。之。文。清。雄。奔。放。名。章。俊。語。絡。繹。間。起。光。明。洞。徹。句。句。動。人。此。則。故。交。元。丹。親。接。斯。議。若。蘇。馬。二。公。愚。人。也。復。何。足。陳。儻。其。賢。者。也。白。有。可。尙。夫。唐。虞。之。際。於。斯。爲。盛。有。婦。人。焉。九。人。而。已。是。知。才。難。不。可。多。得。白。野。人。也。頗。工。於。文。惟。君。

侯顧之。無按劍也。伏惟君侯貴而且賢。鷹揚虎視。齒若編貝。膚如凝脂。昭昭乎若玉山。上行朗然映人也。而高義重諾。名飛天京。四方諸侯。聞風暗許。倚劍慷慨。氣干虹蜺。月費千金。日宴羣客。出躍駿馬。入羅紅顏。所在之處。賓朋成市。故時人歌曰。賓朋何喧喧。日夜裴公門。願得裴公之一言。不須驅馬埒華軒。白不知君侯何以得此聲於天壤之間。豈不由重諾好賢。謙以下士。得也。而晚節改操。棲情翰林。天才超然。度越作者。屈佐鄭國。時惟清哉。稜威雄雄。下懼羣物。自竊慕高義。已經十年。雲山閒之造謁。無路今也。運會得趨。末塵承顏。接辭八九度矣。常欲一雪心跡。崎嶇未便。何圖謗訾忽生。衆口攢毀。將恐投杼。下客震於嚴威。然自明無辜。何憂悔吝。孔子曰。畏天命。畏大人。畏聖人之言。過此三者。鬼神不害。若使事得其實。罪當其身。則將浴蘭沐芳。自屏於烹鮮之地。惟君侯死生不然。投山竄海。轉死溝壑。豈能明目張膽。託書自陳耶。昔王東海問犯夜者曰。何所從來。答曰。從師受學。不覺日晚。王曰。吾豈可鞭撻寧越以立威名。想君侯通人。必不爾也。願君侯惠以

大遇洞開心顏終乎前恩再辱英盼白必能使精誠動天長虹貫日直度易水不以爲寒若赫然作威加以大怒不許門下逐之長途自卽膝行於前再拜而去西入秦海一觀國風永辭君侯黃鶴舉矣何王公大人之門不可以彈長劍乎

唐郭仲翔與吳保安書

永固無恙頃辱書未報值大軍已發深入賊庭果逢撓敗李公戰沒吾爲因俘假息偷生天涯地角顧身世已矣念鄉國眴然才謝鍾儀居然受繫身非箕子日見奴海畔牧羊有類於蘇武宮中射鴈寧期於李陵吾自陷蠻夷備嘗艱苦肌膚毀剔血淚滿地生人至艱吾身盡受以中華世族爲絕域窮囚日居月諸暑退寒襲思老親於舊國望松檟於先塋忽忽發狂膈臆流慟不知涕之無從行路見吾猶爲傷愍吾與永固雖未披款而鄉里先達風味相親想覩光儀不離夢寐昨蒙枉問承問便言李公素知足下才名則請爲管記大軍去遠足下來遲乃足下自後於戎行非僕遺於鄉曲也足下門傳餘慶天祚積善果事期不入而身名並全

向若早事。麾下同參幕府。則絕域之人。與僕何異。吾今在厄。力屈計窮。而蠻俗沒留。許親族往贖。以吾國相之姪。不同衆人。仍苦相邀。求絹十匹。此信通聞。仍索白縑。願足下早附白書報吾伯父。宜以時到。得贖吾還。使亡魂復歸。死骨更肉。唯望足下耳。今日之事。請不辭勞。若吾伯父已去廟堂。難可諮啓。卽願足下親脫石父解夷。吾之驂往贖。華元類宋人之事。濟物之道。古人猶難以足下道義素高。名節特著。故有斯請。而不生疑。若足下不見哀矜。猥同流俗。則僕生爲俘囚之豎。死爲蠻夷之鬼耳。更何望哉。已矣。吳君無落吾事。

宋蘇轍上樞密韓太尉書

轍生好爲文思之至深。以爲文者氣之所形。然文不可以學而能。氣可以養而致。孟子曰。我善養吾浩然之氣。今觀其文章。寬厚宏博。充乎天地之間。稱其氣之小大。太史公行天下。周覽四海。名山大川。與燕趙間豪俊交游。故其文疎蕩。頗有奇氣。此二子者。豈嘗執筆學爲如此之文哉。其氣充乎其中。而溢乎其貌。動乎其言。

而見乎其文而不自知也。轍生十九年矣。其居家所與游者。不過其鄰里鄉黨之人。所見不過數百里之閒。無高山大野可登覽。以自廣。自氏之書。雖無所不讀。然皆古人之陳迹。不足以激發其志氣。恐遂汨沒。故決然捨去。求天下奇聞壯觀。以知天地之廣大。過秦漢之故都。恣觀終南嵩華之高。北顧黃河之奔流。慨然想見古之豪傑。至京師。仰觀天子宮闕之壯。與倉廩府庫城池苑囿之富。且大也。而後知天下之巨麗。見翰林歐陽公聽其議論之宏辯。觀其容貌之秀偉。與其門人賢士大夫遊。而後知天下之文章聚乎此也。太尉以才略冠天下。天下之所恃以無憂。四夷之所憚。以不敢發。入則周公召公出。則方叔召虎。而轍也未之見焉。且夫人之學也。不志其大。雖多而何爲。轍之來也。由於山見終南嵩華之高。於水見黃河之大。且深於人見歐陽公而猶以爲未見太尉也。故願得觀賢人之光耀。聞一言以自壯。然後可以盡天下之大觀而無憾矣。轍年少未能通習吏事。嚮之來。非有取於斗升之祿。偶然得之。非其所樂。然幸得賜歸待選。使得優游數年之閒。將歸

益治其文。且學爲政。太尉苟以爲可教。而辱教之。又幸矣。

宋王安石上相府書

某聞古者極治之時。君臣施道以業天下之民。匹夫匹婦有不與其澤者。爲之焦然。恥而憂之。瞽瞍侏儒亦各得以其材。食之有司其誠心之所化。至於牛羊之踐。不忍不仁於草木。今行葦之詩是也。況於所得士大夫也哉。此其所以上下輯睦。而稱極治之時也。伏惟閣下方以古之道施天下。而某之不肖。幸以此時竊官於朝。受命佐州。宜竭器弩之力。畢思慮。治百姓。以副吾君。吾相於設官任材休息元元之意。不宜以私恩上而自近於不敏之誅。抑其勢有可言。則亦閣下之所宜憐者。某少失先人。今大母春秋高。宜就養於家。日久矣。徒以內外六十口。無田園以託一日之命。而取食不腆之祿。以至於今不能也。今去而野處。念自廢於苟賤不廉之地。然後有以共裘葛。具魚菽。而免於事親之憂。則恐內傷先人之明。而外以累君子。養完人材之德。濡忍以不去。又義之所不敢出也。故輒上書闕下。願殫

先人之邱冢。自託於筦庫。以終犬馬之養焉。伏惟閣下。觀古之所以材。著聲侏儒之道。覽行葦之仁。憐士有好修之意者。不窮之於無所據。以傷其操。使老者得養。而養者雖愚無能。無報盛德於以廣仁孝之政。而曲成士大夫爲子孫之誼。是亦君子不宜得已者也。黷冒威尊。不任惶恐之至。

清陳維崧上芝麓先生書

載別旌門四更。莫茨感知慕德。泣更劇於蚺珠。怨老嗟卑。身竟同於燕石。馳惶無地。哽懼自天。譬之越禽戀燠。終思近日之鄉。代馬衝寒。恆有凌颯之氣。人之情也。能無歎乎。粵自南陽雉。離陳寶雞。鳴日月炳乎八紘。乾坤奠其四極。恩波湛滅北通。弱水之邦。瑞氣昭回。東被無龍之國。凡夫稟氣。靡不蒙慈。獨有文人善於失職。餘姚書佐。不無拾橡之時。丹陽布衣。或類翳桑之客。而崧薄劣。猥荷旃幟。予以吹噓。長其聲價。此則蝸毛蚤翼。悉藉生成。枯木朽株。咸歸雕飾。頌颺曷極。銘鏤奚言。自入中原。於茲三載。託貴游之後乘。廁幸舍之末行。徧歷兩河。頻經八郡。百凡風

緒彌觸悲辛。聊借叢談以資撫掌。慨自蛾飛玉塞。蟻潰金堤。既七聖之路迷。亦百王之道盡。漢臺晉闕。共廢壘以縱橫。伊鼎姜瑱。並頽垣而蕪沒。兔苑賦詩。悵鄒枚之不作。吹臺縱酒。盼高李以何從。復奚言哉。此固然矣。若乃邯鄲爲游俠之魁。朝歌乃輕華之窟。玫瑰作城。東京樊重之家。玳瑁爲梁。西洛石崇之宅。或奕洛瓌之所割據。或買六渾之所攘竊。三條夜啟。游騎歌鐘。五劇晨開。販脂削脯。此皆歷代名都。累朝勝域。今則空餘風月。無復綺羅。淇泉罕巧笑之人。趙國乏報恩之士。魑肩齟齬。卽曰洛陽女兒。葱肆餅餠。便是叢臺年少。詎堪揚挖。徒滋閔嘿。是以刻意矯除。刮磨豪習。孤行峭厲。消耗壯心。抱蝨簡以終年。託螢編而永日。玉杯一卷。珠海千函。非猶非狂。如是而已。所幸學善陸沈。性甘微纒。賓從念劉楨之疾。主客知原憲之貧。濁酒素琴。差無患苦。宵鐘夜漏。聊用襄羊。以此自寬。毋煩相譬。且夫楚腰信美。不登展氏之牀。秦缶雖工。難悅趙王之耳。何則。意脂者易爲容。而情乖者難爲洽也。是以越石抵掌於晏嬰之側。於期搯腕於慶卿之前。魏齊亡命。乃客虞

卿。醜。蔑。不。聊。爰。投。羊。舌。無。他。素。蒙。根。柢。之。知。則。略。其。痕。瘡。夙。荷。優。容。之。雅。則。假。以。羽。毛。耳。崧。之。藉。庇。廿。餘。年。矣。不。幸。崩。摧。酷。遭。割。罰。年。逾。知。命。尙。乏。嗣。續。已。成。張。壯。武。之。心。疾。時。類。羊。南。城。之。淚。流。已。於。商。邱。擬。置。一。媵。非。云。曼。倩。之。小。妻。聊。比。樂。天。之。粗。婢。或。者。李。家。先。德。尙。產。衰。師。阮。氏。清。門。將。生。遙。集。蓬。頭。歷。齒。妄。思。以。買。得。爲。名。執。繖。擎。箱。謬。計。以。醜。奴。作。氏。然。而。客。本。畏。人。居。尤。不。易。必。賴。汝。南。長。者。寵。以。輜。軒。許。下。羣。公。惠。之。談。論。此。其。萍。跡。或。免。蓬。科。倘。有。高。軒。人。魏。幸。言。朱。亥。於。市。中。至。於。絳。綬。游。吳。願。述。伯。鸞。於。廡。下。用。茲。仰。瀆。伏。冀。台。慈。更。有。鄙。懷。統。祈。尊。鑒。崧。以。盧。蒲。髮。短。燭。武。精。亡。處。處。擲。揄。年。年。捐。隸。正。使。石。填。武。擔。詎。塞。愁。倉。土。運。黎。陽。難。平。恨。棧。瑤。姬。無。掃。塵。之。竹。玉。女。寡。洗。頭。之。盆。將。畫。葉。公。之。龍。遂。牽。苟。息。之。馬。雖。復。井。公。縱。博。寧。能。索。笑。於。仙。家。卽。令。鍾。子。刺。船。詎。便。移。情。於。海。上。方。今。成。均。廣。關。石。鼓。宏。鳴。六。館。之。側。負。笈。者。三。千。四。庫。之。旁。橫。經。者。十。九。若。獲。策。其。譎。劣。竭。此。涓。埃。一。觀。太。學。之。碑。便。脫。諸。生。之。籍。未。知。此。語。果。合。事。宜。佇。望。台。裁。以。爲。進。止。嗟。乎。來。日。

大難獨居不樂。天上之愁萬里。人間之怨千年。困豫且之赤鯉。猶然仰沫於洪波。燒爨下之焦桐。尙爾驚魂於妙曲。辭寧敘意。書不宣心。

清李慈銘與王少鶴通政書

比日嚴寒。風雪黯滯。坐失良覲。深歉於懷。頃辱賜書。垂示新翰。非特詞語超絕。抑且性情過人。承將南行。驪駒已戒。晤稀別遽。良用惘然。執事久倦扶搖。眷懷桑梓。況聞丙舍。獨立松楸。未成椎祭之誠。殷然未已。以僕私計。不若從容。卒歲。檀爨錦鄉。飲溯水之屠蘇。聽越人之蜡鼓。青紅樺燭。追外氏之衣冠。雞犬桑麻。辨少時之井里。更以其暇。略涉湖山。古刹殘碑。摩挲乎劫火。紅衫風帽。掩映乎歲華。昔新息倦征。苦憶鄉里之語。山陽思舊。流連鄰舍之筵。執事籍著遐陬。歸仍旅客。入東已罕故人。買山虛設斯願。然而謝傅本非越產。猶擬東山之營。賀鑄久籍衢州。且以慶湖名集。執事首邱之下。近在於三世姻亞。相連多出於四姓。則始寧之戀。豈讓客兒。若耶之遊。詎忘孔邊。夙有深衿。必迫斯語。儻或行計已決。執志莫回。既須取

道海通必於武林度歲。僕罕接人事。頗異羣情。都省紛囂。履聲久絕。南還半載。讖毒日增。芳渠鮑之鄉。不容都迭。豔嫫鹽之貌。爭醜鄭先。郭泰人倫。僞儒所嫉。范滂清議。下士以仇。又況比來。越俗瘁薄。尤甚金榜。無名李杜。不過酒人。白蠟登科。班馬便生。今日僕素情澹定。恥與人爭。但得草堂十椽。稻田半頃。足以庇俛仰。卒歲時有酒百瓶。有書千卷。便當山栖谷汲。謝絕人寰。送往事居。取辦已足。畢景松竹。獨浪煙霞。麋麇與嬉。魑罔自遠。而乃居乏一菽。蕪無半菽。弟妹婚嫁。未了生平。妻妾愁啼。不免寒餓。少有羸疾。比更不良。勞役憂危。理難長久。老母久病。涉冬轉劇。頃日入城就醫。屏營藥餌。望門告貸。喪氣空還。責負索逋。日見凌迫。僕聞裴頠。勺粟損石。以益無。李充吐筵。說士而甘肉。平生羞作干乞。要不能不擇人。而干執事。總中朝之譽。負海內之望。節帥藩服。瞻伺色言。尙以魚釣之名。塵高論之末。性便文字。尤癖山水。或於鴛湖道場。遠則天台雁宕。乞一僻小書院。足使自食。便不他求。聊過荒年。知非溢分。伏維留意。無任企馳。道路方遙。音塵何極。春初灑水。迢迢

雁晨月落桂巖。寥寥猿夕。敬昂光采。無間晤言。別有篇章。當以駟致。

(壬) 況狀

此之爲體。約分四類。綺麗豐縟。儷語尤工。則有君子于役。登彼長途。俛仰山川。流連光景。如鮑明遠大雷書之類。此揚水懷歸。東征破斧之遺也。雄心債薄。文思旁皇。一唱三歎。自適己事。如梁簡文答張纘之類。此漢高猛士魏武短歌之意也。至於吳叔庠陶通明諸書。其屈子玄圃淮南小山之思乎。張乖崖李越縵諸書。其燭武精亡淵明形役之嗟乎。凡錄十九首。

宋鮑照登大雷岸與妹書

吾自發寒雨。全行日少。加秋潦浩汗。山溪狼至。渡泝無邊。險徑游歷。棧石星飯。結荷水宿。旅客貧辛。波路壯闊。始以今日食時。僅及大雷。塗登千里。日踰十晨。嚴霜慘節。悲風斷肌。去親爲客。如何如何。向因涉頓。憑觀川陸。遨神清渚。流睇方曛。東顧五洲之隔。西眺九派之分。窺地門之絕景。望天際之孤雲。長圖大念。隱心者久矣。南則積山萬狀。爭氣負高。含霞飲景。參差代雄。凌跨長隴。前後相屬。帶天有匝。

橫地無窮。東則砥原遠隰。亡端靡際。寒蓬夕卷。古樹雲平。旋風四起。思鳥羣歸。靜聽無聞。極視不見。北則陂池潛演。湖脈通連。葦蒿攸積。菰蘆所繁。栖波之鳥。水化之蟲。智吞愚彊。捕小號噪。驚聒紛物。其中西則迴江。永指長波。天合滔滔。何窮漫漫。安竭創古。迄今舳艫相接。思盡波濤。悲滿潭壑。煙歸八表。終爲野塵。而是注集。長寫不測。修靈浩盪。知其何故哉。西南望廬山。又特驚異。基壓江湖。峯與辰漢。連接上常。積雲霞雕錦。縟若華夕。曜巖澤氣。通傳明散。綵赫似絳。天左右。青靄表裏。紫霄從嶺而上。氣盡金光。半山以下。純爲黛色。信可以神居帝郊。鎮控湘漢者也。若深洞所積。溪壑所射。鼓怒之所。厯擊湧瀆之所。宕滌。則上窮荻浦。下至獠洲。南薄鷺爪。北極雷澗。削長埤短。可數百里。其中騰波觸天。高浪灌口。吞吐百川。寫泄萬壑。輕煙不流。華鼎振濇。弱草朱靡。洪漣隴蹙。散渙長驚。電透箭疾。穹溘崩聚。坻飛嶺覆。回沫冠山。奔濤空谷。礧石爲之摧碎。碕岸爲之榦落。仰視大火。俯聽波聲。愁魄脅息。心驚慄矣。至於繁化殊育。詭質怪章。則有江鷺海鴨。魚鮫水虎之類。豚

首象鼻。芒鬚針尾之族。石蟹土蚌。燕箕雀蛤之儔。折甲曲牙。逆鱗返舌之屬。掩沙漲被草渚。浴雨排風。吹滂弄翻。夕景欲沈。曉霧將合。孤鶴寒嘯。游鴻遠吟。樵蘇一歎。舟子再泣。誠足悲憂。不可說也。風吹雷颺。夜戒前路。下弦內外。望達所屆。寒暑難適。汝專自愼。夙夜戒護。勿我爲念。恐欲知之。聊書所覩。臨塗草蹙。辭意不周。

梁簡文帝與劉孝綽書

執別瀟灑。嗣音阻關。合璧不停。旋灰屢徙。玉霜夜下。旅雁晨飛。想涼燠得宜。時候無爽。既官寺務煩。簿領殷湊。等張釋之條理。同于公之明察。雕龍之才。本傳靈蛇之譽。自高。頗得暇逸。於篇章。從容於文。諷頌擁旄。西邁載離。寒暑曉河。未落拂桂。權而先征。夕鳥歸林。懸孤帆而未息。足使邊心。憤薄鄉思。遑迴。但離關已久。載勞寤寐。佇聞還驛。以慰相思。

梁簡文帝答張纘謝不集書

綱少好文章。於今二十五載矣。竊嘗論之。日月參辰。火龍黼黻。尙且著於玄象。章

乎人事而況文辭可止詠歌可輟乎不爲壯夫揚雄實小言破道非謂君子曹植亦小辯破言論之科刑罪在不赦至如春庭落景轉蕙承風秋雨且晴檐梧初下浮雲生野明月入樓時命親賓乍動嚴駕車渠屢酌鸚鵡驟傾伊昔三邊久留四戰胡霧連天征旗拂日時聞塢笛遙聽寒笳或鄉思悽然或雄心憤薄是以沈吟短翰補綴庸音寓目寫心因事而作

梁蕭統答湘東王求文集及詩苑英華書

得疏知須詩苑英華及諸文製發函伸紙閱覽無輟雖事涉烏有義異擬倫而清
新卓爾殊爲佳作夫文典則累野麗亦傷浮能麗而不浮典而不野文質彬彬有
君子之致吾嘗欲爲之但恨未適耳觀汝諸文殊與意會至於此書彌見其美遠
兼邃古傍暨概典墳學以聚益居焉可賞吾少好斯文迄茲無倦譚經之暇斷務
之餘陟龍樓而靜拱掩鶴關而高臥與其飽食終日寧游思於文林或日因春陽
其物韶麗樹花發鶯鳴和春泉生暄風至陶嘉月而嬉遊藉芳草而眺矚或朱炎

受謝白藏紀時。玉露夕流。金風時扇。悟秋士之心。登高而遠託。或夏條可結。倦於
邑而屬詞。冬雪千里。覩紛霏而興詠。密親離則手爲心使。昆弟宴則墨以歡露。又
愛賢之情。與時而篤。冀同市駿。庶匪畏龍。不如子晉而事似洛濱之遊。多愧子桓
而興同漳川之賞。漾舟玄圃。必集應阮之儔。徐輪博望。亦招龍淵之侶。校覈仁義
源本。山川旨酒。盈疊嘉肴。溢俎曜靈。旣隱繼之以朗月。高春旣夕。申之以清夜。並
命連篇。在茲彌博。又往年因暇。搜採英華。上下數十年閒。未易詳悉。猶有遺恨。而
其書已傳。雖未爲精覈。亦粗足諷覽。集乃不工。而並作多麗。汝旣須之。皆遣送也。
某啟。

梁陶弘景答謝中書書

山川之美。古來共談。高峯入雲。清流見底。兩岸石壁。五色交輝。青林翠竹。四時俱
備。曉霧將歇。猿鳥亂鳴。夕日欲頽。沈鱗競躍。實是欲界之仙都。自康樂以來。未復
有能與其奇者。

梁吳均與宋元思書

風煙俱淨。天山共色。從流飄蕩。任意東西。自富陽至桐廬一百許里。奇山異水。天下獨絕。水皆縹碧。千丈見底。游魚細石。直視無礙。急湍甚箭。猛浪若奔。夾岸高山。皆生寒樹。負勢競上。互相軒邈。爭高直指。千百成峯。泉水激石。泠泠作響。好鳥相鳴。嚶嚶成韻。蟬則千轉不窮。猿則百叫無絕。鸞飛戾天者。望峯息心。經綸世務者。窺谷忘返。橫柯上蔽。在晝猶昏。疎條交映。有時見日。

梁劉潛北使還與永豐侯書

足踐寒地。身犯朔風。暮宿客亭。晨炊謁舍。飄飄辛苦。迄屆旣鄉。雜種覃化。頗慕中國。兵傳李緒之法。樓擬衛律所治。而毳幕難淹。酪漿易饜。王程有限。時反玉關。射鹿胡奴。乃共歸國。刻龍漢節。還持入塞。馬銜苜蓿。嘶立故墟。人獲蒲萄。歸種舊里。稚子出迎。善鄰相勞。倦握蟹螯。亟覆蝦碗。每取朱顏。略多自醉。用此終日。亦以自娛。

唐王維山中與裴迪秀才書

近臘月下。景氣和暢。故山殊可過。足下方溫經。猥不敢相煩。輒便往山中。憩感配寺。與山僧飯訖而去。北涉元灞。清月映郭。夜登華子岡。輞水淪漣。與月上下。寒山遠火。明滅林外。深巷寒犬。吠聲如豹。村墟夜春。復與疎鐘相間。此時獨坐。僮僕靜默。多思曩昔。攜手賦詩。步仄逕。臨清流也。當待春中。草木蔓發。春山可望。輕籥出水。白鷗矯翼。露溼青臯。麥隴朝雉。斯之不遠。儻能從我遊乎。非子天機清妙者。豈能以此不急之務相邀。然是中有深趣矣。無忽。因馱黃蘗人往。不一。山中人王維白。

宋張詠答王觀察書

少年無思算。好陪狂徒。高談極飲。致踰壯歲。方遂策名。泊於登朝。又倅邊郡。塞外清帖。公中事稀。日與虎侯雜戲。爲樂五木未止。六博已興。投壺弈碁。排象旋子。斯實眇末。無足快心。其所至者。蹴鞠引強。擊射算帖。攘袂掣肘。嗥呼爭贏。有以壯臨。

軍之容資佳會之具其或八月草枯皆縱獵寒風吹面則皴裂皮膚驚塵隨人則緇黑衣屨渴飲已冰之酒飢飡連血之肉馬不絕馳弓不下臂知得俊爲快不知勞筋爲苦也又若天清氣和列坐暢飲樂奏繁劇魏絃引前盤槊擊劍以電轉奔騎角觝以虎爭餘興未窮則巨觥相罰非倒囊非頽冠略未云止與希生者道真堪喪魂時弟年方盛氣尙壯酒量過常遂成飲癰沃入膜內栖於膈中良醫不逢積癩成疾陰濁之氣久而下垂旣漸逼於膀胱實難歸於胃腑下洩無路上蒸爲瘡如斯之深又將一紀與膏肓以同道亦腐脇之異名縱得神醫亦難措手誠由性愚不知攝養貪酒不知撙節之所致也非身災命滯之有云有時暫食瘡痛飲水血流到闕二旬未能入見上負明君捨爵之恩下累平生行心之願由此而較乃是罪人數年前兄爲中執中執者諸侯跋扈宰相弄權授受匪人風教頗僻法度踰紊私謁公行繩違整綱眞執憲之用也俾天子之道廓如坦途訥濫之蹤泯然亡絕豈異乎獬豸有睨太阿欲揮持正之風慄然可懼故公卿庶正不可得而

洽也。兄懇苦相念。略無避嫌。親染簡題。手封靈藥。遠在千里。致於下交。必欲祛弟。羸痾。使之下壯。起弟驅走。使之報君。有以見君子之用心。憂於人急於義。不與古賢並者。誰可方。爰屬阻修。尋闕報復。諒不以爲慢。而信爲感之深。兄臨民有仁。馭遠有術。苦寒在候。善飯是宜。無任祝頌瞻望之至。

清毛奇齡與秦留仙翰林書

四月十三日。姓再拜白。留仙足下。無恙。隔侍以來。書疏希闕。比聞東墅。仍赴徵請。爾時車輦。定應就道。然猶寄是者。恐緩去通德。或亦家人道達。不乏郵置。是用略展數言。以回一聽。昨在高齋。酒深燭微。崇譚反幽。梁溪主人。與婁東學士。互泝前朝。好言隱事。醉者振巾。醒者促鳥。此時此景。雖踰年曠祀。當復不忘。然而雞號散車。就暗解竿。方遶東光。已越南泝。既乖前期。復謬後會。是豈心鄙清流。情甘澳跡哉。山深去檻。見華楯而驚其心。野馬未羈。望垂旒而懾於色也。渡江之後。亦歷時地。然且徘徊潁上。紆徐濠右。或乃經旬尙沮。或至彌月不去。今在淮西。已三年矣。

生平好狎。且喜音樂。偶聞唳嘶。停路有待。尋嘗邪許。踴地生憶。往過浦口。豪客王
生。年垂七旬。尙能爲縵聲長吟。隨之江樓。集諸所善。更唱迭和。凡徹三宿。暨乎既
去。猶復回諦。近所依者。淮西金使君耳。亟嘗留娛。每令聽歌。吳哀楚豔。不弛耳目。
去冬雪夜。閒堂設伎。層裊疊幕。標燈環炭。中有所演。年既妙令。意復優好。致極弄
中妍生。爨外賓朋。悚詫臧獲。歎頑豔同。思娛憂均。感此固斯。地創遇亦。或邇歲
罕。遣乃訊所由來。家本夫椒。少好謳彈。擅白雪之佳名。拊紅絃而自惜。爾乃初延
韶響。中下淪落。小吏挾之而趨府。將軍劫之以還鎮。是故賞其有技。而哀其不逢。
爲之拔起。汗浹。諸畧獲。暫厠他部。仍還故里。僕既淪落。與之相同。而歸來無日。
於其行也。南望遷延。若有所恨。是時平橋雨過。樓前日薰。柳花飄園。芍藥墮地。眺
汝水之回波。望平原之迷離。紅亭東去。白日將斜。青草西頭。紫驢猶住。乃徐起哀
彈。更爲變曲。亦既窮極。幼眇備茲。煩怨乃復。歌南浦之詞。詠東歸之什。新聲謬迷。
繁縵。綢雜。僕夫爲之。瞻顧去馬於焉。却秣游子望鄉。而增欵行人停車。而雪涕當

此之時。雖使趙王歸里。東平返國。少女化文魚。以還澗。太子視烏頭而出關。西河在望。吳起將旋北闕。巍然梁生不去。就其所感。又誰不仰視。南浮俯憐。東逝者也。僕本不文。況當臨岐。造次裁付。言辭舛午。無足起予。但區區之意。重有轆轤。且恐其人歸後。仍致失所。是爲相聞。亦欲暇時。一賞其技。且爲語同好有所引也。其人唐姓。使君瀕別。乃有贈字。要之猥瑣無理。全藉昭哲。因白不備。

清陳維崧與陳際叔書

際叔足下。載披新製。歡笑無量。循環把玩。不啻口實。慨自江表喪亂。文籍散脫。掌故流落。有同甲帳。文史毀棄。便類羽陵。風尚所期。惟在足下。今茲書敍。大似休璉。其餘撰述。自多傑作。夫以孔璋之才。不嫻於詞賦。士衡適藻。亦以手重見訾。固知雕蟲小技。未可輕棄也。足下諸賦。已必傳矣。僕才質疎放。姿制誕逸。頗致藍田。猜忿之譏。時諷平子。輕狂之語。間有侯芭。嗜奇之癖。時多吳質。好伎之累。每當四節。之會。風日閒麗。親懿稠密。丹輪徐動。華軒遂盈。當斯時也。賓徒迭進。則神思轉給。

簫笳互激則酬應彌妙。昔大梁侯方域常作文章，必須聲伎，僕不幸遂似之。至於別崇臺入曲房，弛華裳，點利屣，銀燈乍滅，文纓已絕，臣心最歡，才能一石，何論八斗。且夫燥濕之理，各有其宜，動靜之性，奚能一致。若使龍泉不試之盤，錯騏驎不驟之康莊，則羽檄何以擅長，於枚臬書函，何以著稱於齡石。今者塗路既局，神明有限，塊處怵息，忽焉終日，已失裨謀野之助，幾蹈莊叟文犧之喻，而欲矯厲文采，以供撫掌，豈可得耶。將毋過高唐而善謳歌，臨睢渙而思藻績，祇爲欺我無關實事也。會有事務，未能牽綴，崧白。

清洪亮吉與崔瘦生書

瘦生足下。昨攜屐過訪，足下已遊吳門，過梅里，布帆東飛，悵望不及，屈指歸棹，尚無期日。高閣雨坐，益難爲懷。整理故書，因得足下南潯之詩，鄂渚之札，諷誦往復，詞旨悱惻，不報足下久矣。足下得無恨乎。然僕與足下形疏意親，貌遠神近。前在絕域，尙時時貢夢左右。況今得暫同里閨乎。足下此歸，寄居密親之所，僕不喜詣。

人足下所知也。然僕亦有性所樂者。嘗以爲黃金可求。難者素友白璧。尙碎。況乎浮生。故每逢良遊。或值勝侶。覽書不足。續之以夜。又遭罹憂患。悟徹生死。妻子田宅。均非挂懷。惟遇一竹一石一花一草。苟有賞心之境。皆存沒世之想。況春社以後。上巳以前。江南水鄉。景尤奇麗。花始破。萼禽皆出。巢天浮淺。青水作深。綠梨桃萬樹。紅白競放。薺麥百里。青黃雜鋪。時時獨行。故擾野鷗。往往高詠。多穿白雲。或輒遇知舊。縱眺幽遠。行童攜壺。每挂深樹。棼老布席。偏臨曲波。摩挲花朝。睥睨寒食。溪漁煮綠。園笋鋤青。酒白風簾。蔬紅雪徑。當午讀史。凌晨注經。攜朋日昃。語鬼宵半。窮晝夜之觀。極淋漓之致。其樂本可以忘死乎。頃歸田以來。被服粗陋。惟於滋味尙不盡忘。然而霜前斫脍。人效其方。雨後墊巾。世傳爲法。每至塵市。兒童隨之。伺其語言。競相傳播。則亦不知其何意也。自念身歷九死。足踏百險。而筋力尙健。神明不衰。徒步之遊。尙可百里。又回顧同輩。年齒相若。尙有應童子試者。而僕轉憶疇昔。已忝擢上第。回翔禁林。出則握節方州。入則侍經帷幄。雖年未至老人。

皆以輩行尊之。且少耽訓詁粗識吟詠。執贄之驚。盈於軒墀。問奇之酒。充塞庭棟。訪竹別墅。多留劇談。尋花東鄰。咸喜過望。雖灑掃應對。教非西河。而磨礪切磋。士半北面。亦何幸哉。亦何幸哉。伏念前之所歎者。生平好遊宇內靈境。十祇臻七。以爲當待之來世耳。昨歲忽發狂愚。當斷腰領。聖恩高厚。宥之以遠。單車疲羸。卽日上道。有司不知。敦迫萬狀。遂以十二月六日。北出嘉峪關。奚奴脫逃。死友訣別。長城以外。復判人鬼。天地改色。星日不曜。積雪百丈。流沙萬里。汗血之馬。兩斃於道。僅抵戍所。沙同海飛。冰與天接。又或怪火四出。燒雲皆紅。狂風歷時。衝斗盡黑。龍蜃成陣。飛如猱。猱山魘出遊。勢挾風雨。念所不到。目能逢之。夷堅志。奇曾未及此。顧肩背所荷。戈猶未溫。赦書聖馳。已過百驛。天地之德厚矣。日月之照普矣。行路感泣。又況身受。若乃一出。一入。里歷三萬。顛而復起。僵而復活。者。正不計數。然宇宙荒遠之態。人世訝諤之境。無怪不搜。無險不歷。方得稍弛。負僮歸臥。林壑賓朋。驚呼妻子。雪涕百日之後。神理始定。欲求良工。圖所經歷。午枕初貼。爰成臥遊。宵

魂不寧。尙歷關塞。杜門省過。沒齒戴德。暇卽約束子弟。課以耕讀。冀同齊民。時納井稅。期於未死之日。不辜國恩。奄忽之餘。無忝生我。願斯足矣。嗟乎。自非親愛如足下者。亦何敢剖肺附出心曲以相示哉。足下哲昆二人。亦舊相識。仲爲婚姻。伯則同歲。然皆馳騁皇路。雅志用世。束帶終日。腰嫌其疲。文書滿前。手倦於寫。與僕雅趣不同。亦各行其志也。獨足下旣精楮墨。不事科舉。終日靜坐。時而讀書。陳編朽腐。輒得奇趣。又性非泛愛。交必擇友。如僕之外。投分絕少。每與相對。輒至歷時言笑宴宴。信誓旦旦。僕之所絕心折者。僕又何慊於足下哉。俟足下歸。尙欲綜生平所著書。其旨趣意向。有子弟所不及知者。一一告之。足下庶後世知其本末耳。穀雨旣屆。庭花亂門。歸期若遲。恐值風雨。

清胡天游貽友人書

夫西河沈鐘。鼓浮亮於霜響。代北逸駒。振矯嘶於颺日。感物者。氣氣冥感。而微應觸志者。景景覽觸。而方激淮南子云。桑葉落。長年悲。春水碧。秋士思。揚雄致論於

愛日孔父臨悼於逝川。唯彼哲人誠有以也。辭別之後。挹爾獨邁。既析良儔。實屏興賞。振星衣以野飯。裊風駟而寒路。日月載听。至於北海。面朋曷謝。併心蓋寡。齊音異耳。岱封別日。雙鷄兩肩。意困於接席。挾瑟吹竽。思倦於繁會。稷下蕭條。響閭恢論。山川悠遠。曷其展眺。駕言暇日。登乎城隅。雉閣浮蟲。鱗蕞俯櫛。郊鷲駭搏。垆牧羣戢。井墅奕絕。沙原莽屆。颺暎驚心。煙霜楚矚。溯征懣於流水。繹飛轡於曳練。佻佻勞歌。終朝不息。或指謂予曰。此走東牟道也。既負海象。雄兼迅秋。標爽遂有仲宣。吾土之賦。且迸子元神州之歎。故以壯意蕭疎。長謠僨薄。若夫王蠋烈士。嚴光客星。陂浸餘臺。叢荒故閭。東瞻卽墨。南瞰白狼。想囊沙之往軍。緬縱牛之舊壘。莫不雲雨驟越。宇宙遑迴。特澠水湯湯。導聞禹貢。邇其鈎帶。或有絕流。詢彼故老。方云濫軌。潦集洪翻。未極泱泱。以今揆曩。術有殊施。是知陵谷忽爾。遷貿唯彼。聲華樹爲不沒。太傅所以抱登山之悵。征南所以愴沈水之思者也。夫英人奮駕。雄才騰柄。貴及壯華。揚其采烈。夫寧羨透遲乎臧丈。尙槁馘於夷門。伊昔與子流連。

夙夜並現。逖之感。晤深王貢之標。許方謂拂虹蜺。掀扶搖。升玄墟。蹴昆岡矣。何圖。湛盧不揮。鑕於崩。贖舞雩。未銜珠於警。曠籥雲。班阜後。騫青塗之躍。春水抵雀。晚振幽霄之炤。憬此若邁。殷其有懷。攀樹旁。皇武帝從而泫然。撫髀激昂。豫州由是流涕。微我無酒。其能已乎。願襲重福。益滋令名。俾臻良時。極發光耀。追往者逸其軫。貽來者景其躅。徘徊百世之下。恨不見我。若不見古人。乃爲休耳。若夫優游下上。玩弄朝市。朝房孟弋之豔。畫甄蔡門之隊。拊缶鳴鳴。過淇怨戀。人生行樂。亶其然矣。雖佳。俠所游而耿懷。斯渺夫豈丈夫之本趣乎。

清劉嗣綰山中與鮑若洲書

山中十日。庭樹報秋。離形絕塵。曠如自遠。董子云儼然獨處。惟山之意。僕始得之矣。故人不見。城闌致隔。警效猶昨。景光迭新。山木悅君而不知。嶺雲怡我而誰贈。顧此天繪。惜無畫圖。足音窅然。使人失盼。夫一日之感。采葛爲勞。千秋之思。撫松成愴。以余多恨。能無眷眷。山齋雖僻。亦足晏娛。鐘聲上雲。簷翠下雨。冷泉咽其清。

夢瘦竹搖其古魂。山鬼宜笑時來牽蘿野狐工媚。乃復拜月一燈。熒然輒墮。遐想頗望足下能來同之。昔人千里相思猶復命駕。況僕與足下近在咫尺哉。樵風載塗朝暮可至。幸弗令山中人停琴而久思。支筇而長望也。

清吳慈鶴與彭甘亭書

甘亭足下。明月照膽。春風吹懷。二人同心。千里如面。去秋之仲。接展芳訊。輒欲裁答。忽覲家難。家君既南冠北行。賤子亦辭齊入薊。溫清請室。魄再生死。每至朔宇。奏厲芳禱。貢衰鳥獸。多不平之鳴。風雲有可憐之色。周勃至此。方知獄吏之尊。緹縈訟父。思伏金商之下。人生已矣。此情何堪。及邀覆盆之炤。復侍荷戈之行。冬日烈烈。飄風發發。東門帳飲。龍游之馬不多。南紀星郵。雞栖之車大去。從此坐臥蒿藜。舖啜塵土。蒼狼白狐。跳盪左右。驚砂走蓬。委藉耳目。空倉窮鳥。求食而見。羅軼羣孤。獸遭獵而登俎。昔之殫藹挈鄂。馳芳驚藻。今且啜泣霜露。淒其雨雪。則有高岡貞松。孤青表其色。性危霄鷲。隼獨運厲其精神。撫時感序。輒起於邑。二旬之久。

始達淮上。料理檣軸。滂江而行。風顛楚尾。浪惡吳頭。鼉鼉跋浪。將腥大食。之刀蛟龍。繞舩似劫。澹臺之寶。素旄綵繚。而電掣銀山。吶喝而鼓駭。此懦夫之所雀息。常人之所色變。而意氣自若。杯酒無恙。自謂豪健。不減祖生矣。及來南中。遂事戎幕。烏禽白葉。苦竹秋香。天未曉而笳吟營。初春而柳細將軍樹。下竟容長揖之人。都尉軍中。遂有悲歌之客。若夫橫簫直笛。能發揮猛厲。長戈大劍。能馳驟風雨。金堤試馬。玉帳傳杯。青驄而去。驚爲霹靂之聲。白衣而來。坐於橐鞬之右。二肆之鐘。旣陳一石之飲。不醉此闔外之行。樂儒者之奇遇也。至於區脫莫警。刁斗夜鳴。月纖纖而兩頭。風蕭蕭而四起。東不見滄海。北不見燕趙。始信卷菴實引愁之草。美酒無銷憂之用。長安之遠。遠於日邊。刀鏗之思。思在今夕矣。能不膺結神。悴踟躕。悅哉。昨還惠陽。復荷手教。循繹數四。彌感繾綣。惟我與子。跡雖鷓鴣。心則邛駟。離多會少。我勞如何。秋風戒程。將赴京國。取道吳下。冀接音采。鳴榔采香之浦。載酒舞鶴之市。與足下痛飲三日。賦詩百篇。曜靈匿景。繼以華鏡。冶鬢命歌。酌之金盞。

豈不快哉。豈不快哉。知足下惓惓於僕。用醜縷近狀爲報。新詩不多。並附采覽。江南梅熟。風雨錯迕。惟匡居善保。不宣。

清董基誠至青浦縣與弟方立書

星昴南指。客帆北旋。居纔浹辰。復理征棹。炎景初戢。驚颿乍號。沙汀不波。霜葉全脫。僵臥蜩縮。哀思蚪吟。煮冰餐寒。枕流澣夢。不二百里。舟行益艱。風引欲上。潮落欲下。作力逆輓。屹若移山。一夫百呼。寸步尺晷。設復脫去。駛追流星。中心搖搖。倦不成寐。悵別念遠。勞心如何。江月下弦。始達青浦。縣當郡衝。水陸直進。無重關複圍之限。無經日累宿之勞。歆江欲湖。腋吳肘越。在昔周季。置長水縣。始皇東巡。望有王氣。斲掘淫洩。踵名由拳。乃知龍虎騰彩。未驗於天象。斗牛燭精。先妨乎地脈。長圖壯思。卹爾息矣。自縣而西。是爲長泖。圓泖緣其旁。大泖泄其後。極眺無岸。下臨有天。抱雲十圍。帶虹雙市。品殖紛衍。難可紀數。菰蒲棲煙。葭菼落雪。清鱖濁鮒。晨鳧夕雁。殊性各樂。是焉浮游。仲秋既望。迎濤湖頭。雷雨盪於空。霄鼉鼉竄於尺。

壑泓泓汨汨如震如怒詭掣六龍迅瞥孤隼注流矢激閃電顛峩崖裂虛谷覽不
停矚神不注形玄沙爲之聚飛怪石爲之怖立指顧倏忽回光偃靈滌汔乎新涇
澶灑乎申浦解會往復厭陂就夷素精內涵激影四徹倒瀾寫青翔陽墮黑來莫
揆其始去莫躡其蹤也東南九峯景亦清麗曰鳳皇曰庫公曰余曰辰曰薛曰簞
曰澗曰盧曰箕負奇矜雄互相軒軋而其尤者歸之余山穹窿百尋袤延九里石
闕雙峙守之神巖幽靈去來開以一綫花氣叢翠巖光蔚藍赤霞飛來澗盪莫辨
中有奧宇翼臨招提結域中之眞棲拓塵表之別構傑閣翳景危樓陵虛環巒障
之時露一角望舒西曜都成金銀若英東開但見紺碧均足開朗神慮灑練煩垢
及其觀海門之陽候學潭之月憩鍾山之樹徙孔宅之梅訪香亭雪亭之遺擲蓮
湖瓢湖之勝攷之有竟歷之靡窮若乃遜抗之所發迹機雲之所流譽季鷹彥先
之所超逝愷之野王之所棲止長臨遙慨徘徊移辰鬱陶在心俯仰滿目瑣瑣一
世滔滔千秋今人古人曠面絕軌抑又思之火齊之孕清淵吐華夜光之產太璞

含潤昔嘗陵大河。跨喬嶽。軼鄒魯。極雍涼。天圓地方不盡一瞬。斯蹀鐵。翻遑延。此都川靈山英。何以處我亦欲使數君子者。申易代之冥契。感禹公之嗣音也。孤館困寂。殆難爲懷。聊摠遐思。兼述新睹。意緒糾繆。不詳所云。相見有期。懸企不既。

清董祐誠與方彥聞書

彥聞足下。離燭暮地。征帆晨過。索思淒風。積感逝水。渡江北行。土俗迥異。黃菽雜飯。菰蘆結牀。花襲馬蹏。草臥沙磧。訪八公之故館。過清流之巖關。塵驚鳥飛。石訝人立。足蹠十步。時升火光。樹影百尺。才見青氣。自茲以西。地墻天曠。淮潁千里。田廬萬重。水星鏡浮。荇葉帶抱。麥氣朝霧。沆霞亦黃。楸花夜開。土岸皆紫。更復從陸計。逾浹辰。湖都羅交。山盡拱合。松柏翳景。言經北邙之墟。藜蒿蔽天。乃曰洛陽之苑。折軸崎坂。僨車宜陽。函關風雨。道涉黃巷。時則顯月西轉。斜漢左陰。壁囊無階。穴邃有腹。土濕腥鬱。風囊哀號。羸特雜稠。輶軹摩擊。子夜影黑。惟聞人聲。晴光晝紅。乍聽霆裂。越三百里。言臻青門。意欲奏通天賦。宜春求書。茂陵讀碣。驪坂而玉。

盃夜閉幽燐。星飛銅仙秋寒鉛淚露咽鯨膏未燼而劫灰已平矣。關中肘太華股
九嶷帶涇渭。東灞澆龍潭。蟲屋風渡雲棧。皆足警慄心志。淒感性情。昔王粲羈人
嗣宗。狂士登樓。隕涕窮巷。回車僕本恨人。疇能自己。蓋山高川悠。飢促渴役不自
知。休文之園將滅。蘭成之賦易悲也。足下侍歡庭闈。激慮經史。俯仰委蛇。誠足愈
樂。蒙聞桐魚刻蜀樂石響泗。曜靈虧天。井景缺地。故鶴亂異聲而同鳴。餘聽殊類
而合處者。志氣相得也。晤言尙遙。縑素勿曠。傾首東望。山河阻深。書不盡言。幸勉
崇德。

清李慈銘復張香濤編修書

昨晨恩恩渡江。未遑裁答。會疏別遽。悵結臨歧。楚北之行。備承繾綣。得侍知己。豈
不遂懷。顧有三願。亦懷四難。畧陳其概。惟賜周覽。浙局校書。本非鄙意。伍鉛槧於
時輩。讐豕魚於手民。旣喪本真。亦損資望。豈若汎濛水映夫容。爲星帽之上賓。操
畫後之尺枋。其願一也。夙居京輦。頗與華虒。屈指人才。首推執事。木天尺五。帝車

七星每企下風輒慙折軸今得從橫清燕傾倒緒言山公習池屢屈經生之塵羊
傅峴首竊賡登高之篇其願二也生好壯游尤喜衡藝襄荆形勢實寔區之喉衿
屈宋風騷乃文章之鼻祖吞雲夢之氣和郢中之歌屬乎輶軒恣其游覽其願三
也然而彥倫學道累於妻孥思光無家隨其水陸雖曲承推注勸以挈行將覲張
稷於簾前拜德耀於廡下顧舟車錄錄誰爲辦嚴江漢湛湛豈容飛渡縱仰仁祖
之粟莫涉賈季之帑此一難也臬魚之痛甫逾小祥顏烏之墳僅封淺土種松栽
寸塗茨未乾遽辭墓以決行或崩雨而誰屬且使清明麥飯目斷遊子之魂練祭
纈冠行變旅人之飾此二難也息柯三載假貸爲生負刀遠之社錢賃伯通之廡
價酒券多於毛刺魚望白其板門一旦盡室以行四境聞聲而集將見蹋門以罵
或飽老拳搜牢以評幾無完卵此三難也况復山妻佞佛病姬在牀武昌之魚不
慣於菜藏鹿門之藥難支其柴立未免温戀茅檐香貪薺糞荻衣擁髻愁上郭門
之船布帕誦經羞逐東方之騎此四難也緣斯薄祜坐失清歡展念平生良用深

負所恃亮識昭此區區相隔三年此行千里烽煙多梗晤語難期言發至誠握管於邑惟懋樹聲績博翹俊英攝疴未痊千萬珍重

清李慈銘二復趙桐孫書

十五日奉手教並合肥使相書額都轉關約及聘幣發函鄭重循覽悚惶雅注勲拳不知所答伏誦來教院中地窄僅容誦絃西舍三楹可營井臼思之至再實有數難第年未桑榆日資藥餌折枝布枕事事須人勢不能假丸藥於館童付織衽於弟子一也日食所供頗為煩碎葱漆之設悉出南烹醬醢之調深嫌北酪雖米僅一七酒減三蕉而陳留非鮭自循家法蘭陵水麵盡出閩人寒士傳其食單鄉里號為吳味何能以苟延之口食任滅裂之炊奴二也保安寺東驢駒巷北甘楹賃宅十稔於今闢壤栽花疏庭種果夏親視饗冬護封泥桃李垂於檐間楊柳交於楸際杏紅出屋竹翠侵階丁香海棠四周廓窠朱藤一架覆蔭重門竭清俸之經營皆寓公之手植未忍棄茲傳舍遽屬他人任葺豎之毀傷致唬鶯之無主三

也善和舊第。迎恩故鄉。七世藏書。一炬焦土。累年都下。閱市借人。縮食節衣。般薑補繭。粗盈十架。足充三門。亦難悉載。鹿車并堆牛屋。四也。彼之西舍。舊祀先賢。香火同龕。精神所寄。詎可以後來之燕寢。奪先哲之靈祠。著履上廳。將致吳興之崇壞。觀作室。恐成定襄之殃。五也。京邸僮指。本自無多。頑似海鷗。養踰山子。應門掃徑。力已難分。負笈擔簦。事將誰屬。且寓廬荒寂。墻垣不周。無急作之。長鬚乏守。街之獐犬。儻添庸給。爲累益深。六也。長安之居。食玉炊桂。津門都會。晦直一金。胃脯貴於侯封。蝦菜高於酒價。旣挂冠而出。謫旣絕祿。以無官待爲兩地之炊。卽倍八口之食。先生酒饌。豈出門人園官菜蔬。難叨地主七也。緣茲維谷。實類觸藩。然旣已許人。豈容變計。夫東食西宿者。賤女之醜行。得羹乞炙者。餓隸之惡狀。當以明歲仲春之吉。爲出都三日之行。單車入東。迨羣釋菜。佇申良覲。無任神馳。比屆歲闌。想膺多福。諸維惠鑑。不盡欲言。

古今文綜第十册終